

## १ कुरिन्थियों

१ हमार भाई सोस्थिनिस केर सागें पौलुस केर ओर से जेके परमेश्वर अपन ईच्छानुसार यीशु मसीह केर प्रेरित बनेक केर लागिन चुनलक।

२ कुरिन्थुस में स्थित परमेश्वर केर उ कलीसिया केर नाम से; जे यीशु मसीह में पवित्र कराल जाहे, जेमान के परमेश्वर पवित्र आदमी बनेक केर लागिन उकार सागें चुईनेह। जेमान हर कहीं हमार आउर उमान केर प्रभु यीशु मसीह केर नाम पुकारते रहेना।

३ हमार परम आब्बा केर ओर से तथा हमार प्रभु यीशु मसीह केर ओर से तोहरे सोउब कोई के उकार अनुग्रह आउर शांति मिलोक।

### पौलुस केर परमेश्वर के धन्यवाद

४ तोहरे के प्रभु यीशु में जे अनुग्रह प्रदान कराल जाहे, उकार लागिन मोंयं तोहरे केर ओर से परमेश्वर के सोभे समय धन्यवाद देओना। ५ तोहरे केर यीशु मसीह में स्थित केर कारण तोहरे केर कोनो रकाम से अर्थात् समस्त वाणी आउर सम्पूर्ण ज्ञान से सम्पन्न कराल जाहे। ६ मसीह केर विषय में मोंयं जे साक्षी देलों उठु तोहरे केर बीच प्रमाणित होहे। ७ आउर ईकरे परिणामस्वरूप तोहरे ठिन उकार कोनो पुरस्कार केर कमी नैखे। तोहरे हमार प्रभु यीशु मसीह केर प्रकट होवेक केर प्रतिक्षा करते रहाला। ८ उ तोहरे के अन्त तक हमार प्रभु यीशु मसीह केर दिन एक दम निष्कलंक, खरा बनाए रखी। ९ परमेश्वर विश्वासपूर्ण हेके। उकरे द्वारा तोहरे हमार प्रभु आउर उकार बेटा यीशु मसीह केर सत् संगति केर लागिन चुनाल जाहा।

### कुरिन्थुस कलीसिया केर समस्यामान

१० हे भाईमान, हमार प्रभु यीशु मसीह केर नाम में मोर तोहरेसे प्रार्थना आहे कि तोहरे में कोनो मतभेद न होक। तोहरे सोउबकोई एके सागें जुईट रहा आउर तोहरे केर चिंतन आउर लक्ष्य एके होक।

११ मोके खलोए केर घराना केर आदमीमान से पता चईले कि तोहरे केर बीच आपसी झगड़ा आहे। १२ मोंयं ईके कहायें कि तोहरे में से केहो कहेना, “मोंयं पौलुस केर हेकों” होले केहो कहेना, “मोंयं अपुल्लोस केर हेकों।” केकार केकार सोच आहे कि, “उ पतरस केर

हेके” होले केहो कहाला, “उ मसीह केर हेके।” १३ का मसीह बंटाएँ जाहे? पौलुस तो तोहार लागिन क्रूस में नी चईद रहे। का उ चईद रहे? तोहरे के पौलुस केर नाम केर बपतिस्मा तो नी देवाल रहे। होले बतावा का देवाल जाए राहे? १४ परमेश्वर केर धन्यवाद होक कि मोंयं तोहरे में से क्रिसपुस आउर गयुस के छोईड के केखो भी आउर मान के बपतिस्मा नी देहों। १५ ताकि केहो भी ईके न कहेक सकोक कि तोहरे मान के मोर नाम केर बपतिस्मा देवाल जाहे। १६ (मोंयं स्तिफनुस केर परिवार के भी बपतिस्मा देई राहों किन्तु जहाँ तक बाकी आदमीमान केर बात हेके, सेसोउब मोके याईद नैखे कि मोंयं केहो आउर के कभी बपतिस्मा देईहों।) १७ काहेकि मसीह मोके बपतिस्मा देवेक केर लागिन नई, लेकिन वाणी केर कोनो तर्क-वितर्क केर बिना सुसमाचार केर प्रचार करेक केर लागिन भेईज राहे ताकि मसीह केर क्रूस यूँ ही व्यर्थ न चईल जाओक।

### परमेश्वर केर शक्ति आउर ज्ञान-स्वरूप मसीह

१८ उ जेमान भटकायँए, उमान केर लागिन क्रूस केर संदेश एकटु मूर्खता हेके। किन्तु जेमान उद्धार पावायँए उमान केर लागिन उठु परमेश्वर केर शक्ति हेके। १९ शास्त्र में लिखाल आहे:

“ज्ञानिमान केर ज्ञान के मोंयं नष्ट कईर देबों;

आउर सारा चतुरमान केर चतुरता के मोंयं कुंठित

कईर देबों।”

यशायाह २९:१४

२० कहाँ आहाँए ज्ञानी व्यक्ति? कहाँ आहाँए विद्वान? आउर ई युग केर शास्त्रीमान कहाँ आहाँए? का परमेश्वर सांसारिक बुद्धिमानी के मूर्खता नी सिद्ध करलक? २१ ईकार लागिन काहेकि परमेश्वरीय ज्ञान केर द्वारा ई संसार अपन बुद्धि केर जोर से परमेश्वर के नी चिन्हेक सकलक होले हमरे संदेश केर तथाकथित मूर्खता केर प्रचार कराथी।

२२ यहूदीमान तो चमत्कारपूर्ण संकेतमान केर माँग करेना आउर गैर यहूदीमान विवेक केर खोज में आहाँए। २३ किन्तु हमरे तो बस क्रूस में चढ़ाए जावाल मसीह केर

हे उपदेश देवीला। एकझन ऐसान उपदेश जे यहूदीमान केर लागिन विरोध केर कारण हेके आउर गैर यहूदीमान केर लागिन मूर्खता। २५किन्तु उमान केर लागिन जेमान के बोलाए लेवाल जाहे, फिर चाहे उमान यहूदी हेकाँए या गैर यहूदी, ई उपदेश मसीह हेके जे परमेश्वर केर शक्ति हेके, आउर परमेश्वर केर विवेक हेके। २६काहेकि परमेश्वर केर तथाकथित मूर्खता मनुष्यमान केर ज्ञान से बहुत अधिक विवेकपूर्ण आहे। आउर परमेश्वर केर तथाकथित दुर्बलता मनुष्यमान केर शक्ति से बहुत अधिक सक्षम आहे।

२६हे भाईमान, एखान तनिक सोचा कि जेखान परमेश्वर तोहरे के बोलाए राहे होले तोहरे में से बहुत कोई न तो सांसारिक दृष्टि से बुद्धिमान रहाँए आउर न ही शक्तिशाली। तोहरे में से अनेकझन केर सामाजिक स्तर भी कोनो ऊँचा नी राहे। २७लेकिन परमेश्वर तो संसार में जे तथाकथित मूर्खतापूर्ण राहे, उके चुनलक ताकि बुद्धिमान आदमीमान लज्जित होक। परमेश्वर संसार में दुर्बलमान के चुनलक ताकि जेमान शक्तिशाली आहाँए, उमान लज्जित होक।

२८परमेश्वर संसार में ओहेमान के चुनलक जेमान नीच रहाँए, जेमान के घृणा कराल जात राहे आउर जेमान कोनो भी नी रहाँए। परमेश्वर ईमान के चुनलक ताकि संसार जेके कोनो समझेला, उके उ नष्ट कईर सकी। २९ताकि परमेश्वर केर सामने कोनो भी व्यक्ति अभीमान नी करेक पारबाँए। ३०किन्तु तोहरे यीशु मसीह में उकरे कारण स्थित होवा। ओहे परमेश्वर केर वरदान केर रूप में हमार बुद्धि बईन गेलाक। उकरे द्वारा हमरे निर्दोष ठहराय गेली ताकि परमेश्वर के समर्पित होवेक सकबोई आउर हमरे के पापमान से छुटकारा मिल सकी ३१जैसान कि शास्त्र में लिखाल आहे: “यदि केखो कोनो गर्व करेक आहे होले उ प्रभु में अपन स्थिति केर गर्व करोक।”<sup>a</sup>

### क्रूस में चढाल मसीह केर विषय में संदेश

२ हे भाईमान, जेखान मोंयं तोहरे ठिन आए राहों होले परमेश्वर केर रहस्यपूर्ण सच केर, वाणी के चतुरता अथवा मानव बुद्धि केर साथ उपदेश देईके नी आए राहों ३काहेकि मोंयं ईके निश्चय कईर लेई राहों कि तोहरे केर बीच रहते कि, मोंयं यीशु मसीह आउर क्रूस में होवाल उकार मृत्यु के छोईड के कोनो आउर बात के नी जानबों। ४मेहेसे मोंयं दीनता केर साथ डर से काँपते काँपते तोहरे ठिन आए राहों। ५आउर मोर वाणी

तथा मोर संदेश मानव बुद्धि केर लुभावने शब्दोमान से युक्त नी राहे लेकिन उमान में राहे आतमा केर शक्ति केर प्रमाण ६ताकि तोहरे केर विश्वास मानव बुद्धि केर बजाय परमेश्वर केर शक्ति में टिकोक।

### परमेश्वर केर ज्ञान

६जेमान समझदार आहाँए, उमान के हमरे बुद्धि देईला किन्तु ई बुद्धि ई युग केर बुद्धि न लगे, न ही ई युग केर उ शासकमान केर बुद्धि हेके जेसोउब विनाश केर सगार में आनाल जाथे। ७ईकार जगह में हमरे होले परमेश्वर केर उ रहस्यपूर्ण विवेक के देवीला जे छिपाल राहे आउर जेके अनादि काल से परमेश्वर हमार महिमा केर लागिन निश्चित कईर राहे। ८आउर जेके ई युग केर कोनो भी शासक नी समझेलाँए काहेकि यदि उमान उके समईझ पाए राहताँए होले उमान उ महिमावान प्रभु के क्रूस में नी चढाताँए। ९किन्तु शास्त्र में लिखाल आहे:

“जेसोउब के आँईख देईख नी पालाक

आउर कानमानों नी सुनलक;

जहाँ मनुष्य केर बुद्धि तक कभी नी पहुँचलक

ऐसान बातमान

उमान केर हेतु प्रभु बनालक जेमान उकार प्रेमी

होवाल रहाँए।” यशायाह ६४:४

१०किन्तु परमेश्वर उसोउब बातमान के आतमा केर द्वारा हमार लागिन प्रकट कईरहे।

आतमा सोउब रकाम केर बात के खोईज निकलाएला हियाँ तक कि परमेश्वर केर छिपाल गहराई तक केर। ११ऐसान के आहे जे दोसरा मनुष्य केर मन केर बात के जाईन पाएला सिवाय उ व्यक्ति केर उ आतमा केर जे उकार अपन भीतरेहे आहे। येहे रकाम परमेश्वर केर विचारमान के भी परमेश्वर केर आतमा के छोईड के आउर के जाईन सकेला। १२किन्तु हमरे में तो सांसारिक आतमा नैखे लेकिन उ आतमा पाही जे परमेश्वर से मिलेला ताकि हमरे उ बातमान के जाईन सकबोई जेसोउब के परमेश्वर हमरे के मुक्त रूप से देईहे।

१३ओहे बातमान के हमरे मानवबुद्धि द्वारा विचार कराल कथामान में नी बोलिला लेकिन आतमा द्वारा विचार कराल कथामान से आतमा केर वस्तुमान केर व्याख्या कईरके बोलिला। १४एकझन प्राकृतिक व्यक्ति परमेश्वर केर आतमा द्वारा प्रकाशित सच के ग्रहण नी करेला काहेकि उकार लागिन उसोउब बातमान मूर्खता

होवेला, उ उसोउब के समईझ नी पाएला काहेकि उसोउब आतमा केर आधार मेंहे परखाल जाए सकेला।<sup>१५</sup>आध्यात्मिक मनुष्य सोउब बातमान केर न्याय कईर सकेला किन्तु उकार न्याय कियो नी कईर सकेना। काहेकि शास्त्र कहेला:

१६ “प्रभु केर मन के केहार जानेला?

उके का सिखाल जाए?”

यशायाह ४०:१३

किन्तु हमार ठिन यीशु केर मन आहे।

### मनुष्यमान केर अनुसरण उचित नैखे

३ किन्तु हे भाईमान, मोंग्रं तोहरे मान से वैसाने बात नी करेक पारलों जैसान आध्यात्मिक आदमीमान से करोना। मोके ईकार विपरीत तोहरे मान से वैसाने बात करेक होलाक जैसान सांसारिक आदमीमान से कराल जाएला। यानी उमान से जेमान एखान मसीह में छौवा हेकाँए।<sup>२</sup>मोंग्रं तोहरे के पीएक लागिन दूध देलों, टान आहार नई; काहेकि तोहरे एखान उके खाएक नी सकता आउर न ही तोहरे ईके आईज भी खाएक सकबा।<sup>३</sup>काहेकि तोहरे एखान तक सांसारिक आहा। का तोहरे सांसारिक न लगा? काहेकि तोहरे में आपसी ईर्थ्या आउर झगड़ा मौजूद आहे। आउर तोहरे सांसारिक व्यक्तिमान जैसान व्यवहार कराला।<sup>४</sup>जेखान तोहरे में से केहो कहाला, “मोंग्रं पौलुस केर हेकों” आउर दोसरा कहाला, “मोंग्रं अपुल्लोस केर हेकों” होले का तोहरे सांसारिक मनुष्यमान केर रकाम आचरण नी करथा जानों?

<sup>५</sup>अच्छा होले बतावा अपुल्लोस का हेके आउर पौलुस का हेके? हमरे तो केवल उ सेवक हेकि जेकार द्वारा तोहरे विश्वास के ग्रहण कईरा। हमार में से हर एकझन बस उ काम कईरीह जेसोउब के प्रभु हमरे के सौईप राहे।<sup>६</sup>मोंग्रं बीज बुनलों, अपुल्लोस उके पानी देलाक; किन्तु उकार बढोतिरी तो परमेश्वरे करलक।<sup>७</sup>ई रकाम न तो उ जेहार बुनलक उ, बड़का हेके, आउर न ही उझन जेहार उकार में पानी देलाक। लेकिन बड़का तो परमेश्वर हेके जे उके बढालक।

<sup>८</sup>उ जे बुनेला आउर उ जे पानी देवेला, नम्रमानझन केर प्रयोजन समान आहे। सेहेसे हर एकझन अपन काम केर परिणाम केर अनुसार प्रतिफल पाबाँए।<sup>९</sup>परमेश्वर केर सेवा में हमरे सोउब सहकर्मी हेकि।

तोहरे परमेश्वर केर खेत हेका। परमेश्वर केर मन्दिर हेका।<sup>१०</sup>परमेश्वर केर उ अनुग्रह केर अनुसार जे मोके

देवाल जाए राहे, मोंग्रं एकझन कुशल प्रमुख शिल्पी केर रूप में नीव डाललों किन्तु उकार ऊपरे निर्माण होले केहो दोसराहे कराथे; किन्तु हर एकझन के सावधानी केर साथ ध्यान रखेक लगी कि उ उकार ऊपरे निर्माण कैसान कराथे।<sup>११</sup>काहेकि जे नीव डालाल जाहे उ निजे यीशु मसीह हेके आउर उकार से भिन्न दोसरा नीव कियो डाईल नी सकेना।<sup>१२</sup>यदि आदमीमान उ नीव में निर्माण कराथौँए, फिर चाहे उमान उकार में सोना लगाओक, चाँदि लगाओक, बहुमूल्य रत्न लगाओक, काठ लगाओक, खेर लगाओक या नरा केर प्रयोग करोक।<sup>१३</sup>हर व्यक्ति केर काम स्पष्ट रूप से देखाए जाई। काहेकि उ दिन<sup>१४</sup> उके उजागर कईर देई। काहेकि उ दिन ज्वाला केर साथ प्रकट होई आउर ओहे ज्वाला हर व्यक्ति केर काममान के परखी कि उमान काम कैसान कईरौँए।<sup>१५</sup>यदि उ नीव में कोनो व्यक्ति केर काममान केर रचना टिकाऊ होई<sup>१६</sup>होले उ उकार प्रतिफल पाई आउर यदि केकरो काम उ ज्वाला में भस्म होए जाई होले उके हानि उठाएक होई। किन्तु फिर भी उ निजे वैसानेहे बईच निकली जैसान कोनो आगुन लगाल घर में से भाईग के बईच निकलेना।

<sup>१६</sup>का तोहरे नी जानाला कि तोहरे मान निजे परमेश्वर केर मन्दिर हेका आउर परमेश्वर केर आतमा तोहरे में निवास करेला? <sup>१७</sup>यदि केहो परमेश्वर केर मन्दिर के हानि पहुँचाएला होले परमेश्वर उके नष्ट कईर देई। काहेकि परमेश्वर केर मन्दिर तो पवित्र आहे। हाँ, तोहरेहे तो उ मन्दिर हेका।

<sup>१८</sup>अपन के न ठका। यदि तोहरे में से कियो ईके सोचाथा कि ई युग केर अनुसार उ बुद्धिमान हेके होले उके बस तथाकथित मूर्खाँए बईन राहेक लगे ताकि उ सचमुच बुद्धिमान बईन जाओक; <sup>१९</sup>काहेकि परमेश्वर केर दृष्टि में सांसारिक चतुरता मूर्खता हेके। शास्त्र कहेला, “परमेश्वर बुद्धिमानमान के ओहेमान केर चतुरता में फँसाए देवेला।”<sup>२०</sup>आउर फिर, “प्रभु जानेला बुद्धिमानमान केर विचार सोउब वर्थ्य हेके।”<sup>२१</sup>ईकार लागिन मनुष्यमान में केखो भी गर्व नी करेक लगे काहेकि ई सोउब कुछ तोहारे तो हेके।<sup>२२</sup>फिर चाहे उ पौलुस होक, अपुल्लोस होक या पतरस चाहे संसार होक, जीवन होक या मृत्यु होक, चाहे ई आईज केर बातमान होक या आवेक वाला कईल केर। सोभे कुछ तोहारे तो हेके।<sup>२३</sup>आउर तोहरे मसीह केर हेका आउर मसीह परमेश्वर केर।

<sup>१३</sup> ३:१३ उ दिन उ दिन जेखान यीशु सोभे आदमीमान केर न्याय करेक केर लागिन आवी।

### मसीह केर संदेशवाहक

४ हमार बारे में कोनो व्यक्ति के ईरकाम सोचेक लगे कि हमरे मान मसीह केर सेवक हेकि। परमेश्वर हमरे के आउर रहस्यपूर्ण सच सौँईपे। १ आउर फिर जेमान के ई रहस्य सौँईपे, उमान केर ई दायित्व भी हेके कि उमान विश्वास योग्य होंक। २ मोके ईकार तनिक भी चिंता नैखे कि तोहरे मान मोर न्याय करबा या मनुष्यमान केर कोनो आउर अदालत में। मोंयं निजे भी अपन न्याय नी करोना। ३ काहेकि मोर मन स्वच्छ आहे। किन्तु ईकार कारण मोंयं छूईट नी जाबों। प्रभु तो एके आहे जे न्याय करेला। ४ ईकार लागिन ठीक समय आवेक केर पहिले अर्थात् जेखान तक प्रभु नी आए जाई, सेखान तक कोनो भी बात केर न्याय न करा। ओहे अन्धार में छिपाल बातमान के उजागर करी आउर मन केर प्रेरणा के प्रकट करी। उ समय परमेश्वर केर ओर से हर एकइन केर उपयुक्त प्रशंसा होई।

५ हे भाईमान, मोंयं ईसोउब बातमान के अपुल्लोस में आउर निजे अपन में तोहरे मान केर लागिन उदाहरण देलों ताकि तोहरे हमार उदाहरण देईखके उ बातमान के न लाँईध जावा जेसोउब शास्त्र में लिखाल आहे। ताकि एकइन व्यक्ति केर पक्ष लेईके आउर दोसरा केर विरोध करईके अहंकार में न भईर जावा। ६ के कहेला कि तोयं केहों दोसरा से अधिक अच्छा आहिस। तोर टिन अपन ऐसान का आहे? जे तोके देवाल नी जाहे? आउर जेकान तोके सोउब कुछ केकरो द्वारा देवाल जाहे होले फिर ई रूप में अभिमान का बात केर जैसान तोयं केकरो से कोनो पावे नी करईरिस।

७ तोहरे मान सोचाथा कि जेसोउब वस्तु केर तोहरे केर दरकार राहे, एखान उ सोउब कुछ तोहार टिन आहे। तोहरे सोचाथा एखान तोहरे सम्पन्न होए जाहा। तोहरे हमार बिना राजा बईन के बैठा। कितना अच्छा होताक कि तोहरे सचमुच राजा होता ताकि तोहार सागें हमरे भी राज्य करती। ८ काहेकि मोर विचार आहे कि परमेश्वर हमार प्रेरितमान केर कर्म-क्षेत्र में उ आदमीमान केर समान सोउबसे अंत में जगह देहे जेमान के मृत्यु-दण्ड देवाल जाए चुईके। काहेकि हमरे समूचा संसार, सोरगदूतमान आउर आदमीमान केर सामने तमाशा बईन जाही। ९ हमरे मसीह केर लागिन मूर्ख बईनी किन्तु तोहरे मान मसीह में बहुत बुद्धिमान होहा। हमरे दुर्बल आही किन्तु तोहरे तो बहुत सबल होहा। तोहरे सम्मानित होहा आउर हमरे अपमानित। १० ई समय तक हमरे होले भूखा-प्यासा आही। फटाल-पुरना चिथड़ा पिन्धी। हमार सागें बुरा

व्यवहार कराल जाएला। हमरे बेघर आही। ११ अपन हाथ से काम करईके हमरे मेहनत मजदूरी करिला। १२ गार्इर खाए के भी हमरे आशीर्वाद देईला। सताल जाएला लेकिन हमरे उके सहिला। जेखान हमार बदनाम होए जाएला, हमरे सेखान भी मीठा बोलिला। हमरे एखान भी जैसान ई दुनिया केर लेटरा-फेन आउर जाबड़ा कचरा बनले आही।

१३ तोहरे के लाज्ज देवेक केर लागिन मोंयं ईके नी लिखाथों। लेकिन अपन प्रिय छौवामान केर रूप में तोहरे के चेतावनी देवाथों। १४ काहेकि चाहे तोहार टिन मसीह में तोहरे केर दसिमान हजार संरक्षक मौजूद आहाँ, किन्तु तोहरे केर बाप तो अनेक नैखाँए। काहेकि सुसमाचार द्वारा मसीह यीशु में मोंयं तोहरे केर बाप बईनों। १५ ईकार लागिन तोहरे के मोर आग्रह आहे, मोर अनुकरण करा। १६ मोंयं ईकरे लागिन तिमथियुस के तोहरे टिन भेईजों। उ प्रभु में स्थित मोर प्रिय एवम् विश्वास करेक योग्य बेटा हेके। यीशु मसीह में मोर आचरणमान के उ तोहरे के याईद दिलाई। जेमान के मोंयं हर कहीं, हर कलीसिया में उपदेश देहों।

१७ थोड़ा आदमीमान अंधकार में ई रकाम फूईल उईठाँए जैसान कि एखान मोके तोहार टिन केखनों आवेके न होक। १८ यदि परमेश्वर चाही होले शीघ्रहे मोंयं तोहार टिन आबों आउर फिर अहंकार में फूलाल उ आदमीमान केर सिर्फ अहंकार के नई लेकिन उमान केर शक्ति के देईख लेबों। १९ काहेकि परमेश्वर केर राज्य अहंकार में नई, शक्ति में टिकाल आहे। २० तोहरे का खोजाला: हाथ में लाठी धाईर के मोंयं तोहार टिन आबों या कि प्रेम आउर कोमल आतमा साथ में आनबों?

### कलीसिया में दुराचार

५ सचमुच ऐसान बतल जाहे कि तोहरे मान में दुराचार फैलाल आहे। ऐसान दुराचार-व्यभिचार तो अधर्मिमान में भी नी मिलेला। जैसान केहो तो अपन मोसि केर सागें सहवास करेना। २ आउर फिर तोहरे मान अभिमान में फूईल जाहा। किन्तु का तोहरे ईकार लागिन दुखी होएक नी लगी? जे केहो ऐसान दुराचार करेना उके तो तोहरे अपन बीच से निकलाए के बाहिर करेक लईग राहे। ३ मोंयं यद्यपि शारीरिक रूप से तोहरे केर बीच नैखों किन्तु आत्मिक रूप से तो हुवाँए उपस्थित आहों। आउर माईन लेवा कि हुवाँ उपस्थित रईकेहो जेहार ऐसान बुरा काम करई, उकार विरुद्ध मोंयं अपन ई निर्णय देई चुईकों ४ कि जेखान तोहरे मोर सागें हमार प्रभु यीशु केर नाम में

मोर आतमा आउर हमार प्रभु यीशु केर शक्ति केर साथ एकत्रित होवा "होले ऐसान व्यक्ति के उकार पापपूर्ण मानव स्वभाव के नष्ट कईर डालेक केर लागिन शैतान के सौँईप देवाल जाई ताकि प्रभु केर दिन उकार आतमा केर उद्धार होए सकी।

६तोहरे केर ई बड़बोलापन अच्छा न लगे। तोहरे ई कहावत के तो जानाला, "थोड़ा सा खमीर आटा केर पूरा लौंदा के खमीरमय कईर देवेला।" ७पुरना खमीर से छुटकारा पावा ताकि तोहरे आटा केर नौतून लौंदा बईन सकबा। तोहरे तो बिना खमीर वाला फ़सह केर रोटी केर समान होहा। हमरे के पवित्र करेक केर लागिन मसीह के फ़सह केर मेमना केर रूप में बलि चढ़ाए देवाल गेलाक। ८ईकार लागिन आवा हमरे अपन फ़सह पर्व बुराई आउर दुष्टता से युक्त पुरना खमीर केर रोटी से नई लेकिन निष्ठा आउर सच्चाई से युक्त बिना खमीर केर रोटी से मनाबोई।

९अपन आगे केर चिठ्ठी में मोंयं लिख राहों कि तोहरे के उ आदमीमान से अपन नाता नी रखेक लगी जेमान व्यभिचारी हेकाँए। १०मोर ईकार प्रयोजन बिलकुल नी राहे कि तोहरे ई दुनिया केर व्यभिचारिमान, लोभियामान, ठकरा या मूर्ति-पूजकमान से कोनो सम्बन्धे न रखा। ऐसान होई लेकिन होले भी तोहरे के ई संसार सेए निकईल जाएक होई। ११किन्तु मोंयं तोहरे के जे लिखों, उसोउब हेके कि कोनो ऐसान व्यक्ति से नाता न रखा जे अपन के मसीही भाई कई के भी व्यभिचारी, लोभी, मूर्तिपूजक चुगलखोर, पियक्कड़ या एकझन ठकरा हेके। ऐसान व्यक्ति केर सागें होले भोजन भी ग्रहण न करा।

१२जे आदमीमान बाहिरे केर हेकाँए, कलीसिया केर नई, उमान केर न्याय करेक केर भला मोर का काम। का तोहरे के ओहेमान केर न्याय नी करेक लगी जेमान कलीसिया केर भीतरे केर हेकाँए? १३कलीसिया केर बाहिरे वालामान केर न्याय तो परमेश्वर करी। शास्त्र कहेला: "तोहरे पाप के अपन बीच से बाहिरे निकलाए देवा।" १४

### आपसी विवादमान के लिपटावा

६ १का तोहरे में से कियो ऐसान आहाँए जे अपन साथी केर सागें कोनो झगड़ा होएके परमेश्वर केर पवित्र पुरुषमान केर ठिन नी जाए के अधर्मी आदमीमान केर अदालत में जाएक केर साहस करेना? २अथवा का तोहरे नी जानाला कि परमेश्वर केर पवित्र पुरुषमान जगत केर न्याय करबाँए? आउर जेखान तोहार द्वारा सारा

संसार केर न्याय कराल जाए होले का अपन ई छोटी-छोटी बातमान केर न्याय करेक केर योग्य तोहरे नैखा कि? ३का तोहरे नी जानाला कि हमरे सोरगदूतमान केर भी न्याय करबोई? फिर ई जीवन केर विषय केर छोटी मोटी बातमान के होले कहेक केर कोनो बाते नैखे। ४यदि हर दिन तोहरे केर बीच केकरो कोनो विवाद राहेलाए होले का न्यायाधीश केर रूप में तोहरे ऐसान व्यक्तिमान के नियुक्त करबा जेमान केर कलीसिया में कोनो जगह नैखे। ५ईसोउब के मोंयं तोहरे के ईकार लागिन कहाथों कि तोहरे के थोड़ा लाज लगेक। का स्थिति ईतनाए बिगईड चुईके कि तोहरे केर बीच कोनो ऐसान बुद्धिमान पुरुष नैखाँए जे अपन मसीही भाईमान केर आपसी झगड़ा के सुलझाए सकी? ६का एकझन भाई केखनों अपन दोसरा भाई से मुकदमा लड़ेला! आउर तोहरे तो अविश्वासिमान केर सामने ऐसान कराथा।

७वास्तव में तोहरे केर हार तो ईकरे में होए चुईके कि तोहरे केर बीच आपस में कानूनी मुकदमा आहे। ईकार बदलि में तोहरे आपस में अन्याय केहे काहे नी सईह लेवाला? अपन के काहे नी लुटाए जाएक देवाथा। ८तोहरे तो निजे अन्याय कराला आउर अपन मसीही भाईमान के लूटाला!

९अथवा का तोहरे नी जानाला कि बुरा आदमीमान परमेश्वर केर राज्य केर उत्तराधिकार नी पाबाँए? अपन के मूर्ख न बनावा। यौनाचार करेक वाला, मूर्ति पूजक, व्यभिचारी, गुदा-भंजन कराएक वाला, निन्दा करोईया, १०लुटेरा, लालची, पियक्कड़, चुगलखोर आउर ठकरामान परमेश्वर केर राज्य केर उत्तराधिकारी नी होबाँए। ११तोहरे में से केहोमान ऐसाने रहाँए। किन्तु एखान तोहरे के धोवाल गेलाक आउर पवित्र कईर देवाल आहे। तोहरे के परमेश्वर केर सेवा में अर्पित कईर देवाल जाहे। प्रभु यीशु मसीह केर नाम आउर हमार परमेश्वर केर आतमा केर द्वारा उमान के धर्मी करार देवाल जाए चुईके।

### अपन शरीर के परमेश्वर केर महिमा में लगावा

१२"मोंयं कोनो भी करेक केर लागिन स्वतन्त्र आहों।" किन्तु हर कोनो बात हित केर नी होवेला। हाँ! "मोंयं सोउब कुछ करेक केर लागिन स्वतन्त्र आहों।" किन्तु मोंयं अपन में केखो भी हावी होवेक नी देबों। १३कहाल जाएला, "खाना पेट केर लागिन आउर पेट खाना केर लागिन हेके।" किन्तु परमेश्वर ई नम्रमान के समाप्त कईर देई। आउर हमार शरीर भी तो यौन-अनाचार केर लागिन न लगे लेकिन प्रभु केर सेवा केर लागिन हेके। आउर

प्रभु हमारा देह केर कल्याण केर लागिण हेके। १५परमेश्वर केवल प्रभु केहे पुनर्जीवित नी कईरे लेकिन अपन शक्ति से उ मृत्यु से हमरे सोउब कोई के भी जिलाए उठाई। १६का तोहरे नी जानाला कि तोहरे केर शरीर निजे यीशु मसीह से जुड़ाए आहे? होले का मोके उमान के, जेमान मसीह केर अंग हेकाँए, कोनो वेश्या केर अंग बनाए देवेक लगी? १७निश्चय नई। अथवा का तोहरे ईके नी जानाला, कि जे अपन के वेश्या से जोड़ेला, उ उकार सागें एक देह होए जाएला। शास्त्र में कहाल जाहे: “काहेकि उमान नम्रमानझन एक देह होए जाबाँए।”<sup>१७</sup> १८किन्तु उ जे अपन लौ प्रभु से लगाएला, उकार आतमा में एक होए जाएला। १९यौनवासना से दूर रहा। दोसरा सोभे पाप जेसोउब के एकझन व्यक्ति करेला, उकार शरीर से बाहिर होवेला किन्तु ऐसान व्यक्ति जे व्यभिचार करेला उ तो अपन शरीर केरे विरुद्ध पाप करेला। २०अथवा का तोहरे नी जानाला कि तोहरे केर शरीर उ पवित्र आतमा केर मन्दिर हेके जेके तोहरे परमेश्वर से पाहा आउर जे तोहरे केर भीतरे निवास करेला। आउर उ आतमा तोहरे केर अपन न लगे, २१काहेकि परमेश्वर तोहरे के दाम चुकाए के किन्हे। ईकार लागिण अपन शरीर केर द्वारा परमेश्वर के महिमा प्रदान करा।

### शादी

१एखान उसोउब बातमान केर बारे में जे तोहरे लिख रहा: अच्छा येहे हेके कि कोनो पुरुष कोनो स्त्री के नई छुओक। २किन्तु यौन अनैतिकता केर घटनामान केर सम्भावनामान केर कारण हर पुरुष केर अपन पत्नी होवेक लगी आउर हर स्त्री केर अपन पति। ३पति पत्नी केर रूप में जे कुछ पत्नी केर अधिकार बनेला, उके देओक। आउर येहे रकाम पत्नी भी पति के उके यथोचित प्रदान करोक। ४अपन शरीर में पत्नी केर कोनो अधिकार नैखे लेकिन उकार पति केर आहे। आउर येहे रकाम पति केर भी उकार अपन शरीर में कोनो अधिकार नैखे, लेकिन उकार पत्नी केर आहे। ५अपन के प्रार्थना में समर्पित करेक केर लागिण थोड़ा समय तक एक दोसरा से समागम नी करेक केर आपसी सहमती के छोईडके, एक दोसरे के संभोग से वंचित न करा। फिर आत्म-संयम केर अभाव केर कारण कहीं शैतान तोहरे के कोनो परीक्षा में न डाईल देओक, ईकार लागिण तोहरे फिर समागम कईरे लेवा। ६मोंयं ईके एकटु छूट केर रूप में कहाथों, आदेश केर रूप में नई। ७मोंयं तो चाहोना

सोभे आदमीमान मोर जैसान होवा। किन्तु हर व्यक्ति के परमेश्वर से एक विशेष बरदान मिले। केकरो जीएक केर एकरकाम ढंग आहे तो दोसरे केर दोसरा रकाम।

१एखान मोके अविवाहितमान आउर विधवामान केर बारे में येहे कहेक आहे:यदि उमान मोर समान एकलाए रहबाँए होले उमान केर लागिण ईटु उत्तम होई। २किन्तु यदि उमान अपन में काबू नी रखेक सकबाँए होले उमान विवाह कईरे लेवेक लगे; काहेकि वासना केर आगुन में जलते रहेक से विवाह कईरे लेवेक अच्छा होई।

३एखान जेमान विवाहित हेकाँए उमान के मोर ई आदेश आहे, (यद्यपि ईटु मोर न लगे, लेकिन प्रभु केर आदेश हेके) कि कोनो पत्नी के अपन पति नी त्यागेक लगे। ४किन्तु यदि उ उके छोईड देई होले उके फिर अविवाहिते रहेक लगे या अपन पति से मेल-मिलाप कईरे लेवेक लगे। आउर ऐसानेहे पति के भी अपन पत्नी के छोडेक नी लगे।

५एखान शेष में आदमीमान के मोर येहे कहेक आहे, ईके मोंयं कहाथों न कि प्रभु यदि कोनो मसीही भाई केर कोनो ऐसान पत्नी आहे जे ई मत में विश्वास नी करेला आउर उकार सागें रहेक लागिण सहमत आहे होले उके त्याईग देवेक नी लगे। ६ऐसानेहे यदि कोनो स्त्री केर कोनो ऐसान पति आहे जे पंथ केर विश्वासी नैखे किन्तु उकार सागें रहेक लागिण सहमत आहे होले उ स्त्री के भी अपन पति के त्यागेक नी लगी। ७काहेकि उ अविश्वासी पति विश्वासी पत्नी से निकट संबन्धमान केर कारण पवित्र होए जाएला आउर येहे रकाम उ अविश्वासिनी पत्नी भी अपन विश्वासी पति केर निरन्तर सागें रहेक से पवित्र होए जाएला। नी होले तोहरे केर संतान अस्वच्छ होए जाताक किन्तु एखान होले उमान पवित्र आहाँए।

८फिर भी यदि कोनो अविश्वासी अलग होवेक खोजेला होले उ अलग होए सकेना। ऐसान स्थिति में कोनो मसीही भाई या बहिन में कोनो बंधन लागू नी होई। परमेश्वर हमरे के शांति केर साथ रहेक लागिण बोलाहे। ९हे पत्निमान, का तोहरे जानाला? होए सकी होले तोहरे अपन अविश्वासी पतिमान के बचाए लेवा।

### जैसान आहा, वैसानेहे जिआ

१प्रभु जेके जैसान देईहे आउर जेके जे रूप में चुईने, उके वैसानेहे जीएक लगी। सोभे कलीसिया मान में मोंयं ईकरे आदेश देओना। २जेखान केखो परमेश्वर केर द्वारा बोलाल गेलाक, होले यदि उ खतना युक्त राहे होले उ अपन खतना छिपाएक नी लगी। आउर केखो ऐसान

दशा में बोलाल गेलाक जेखान उ बिना खतना केर राहे होले उकार खतना करेक नी लगे। १<sup>१</sup>खतना तो कोनो न लगे, आउर न ही खतना नी होवेक कोनो हेके। लेकिन परमेश्वर केर आदेशमान केर पालन करेक ठुहे सोउब कुछ हेके। १<sup>२</sup>हर एकइन के उकार स्थिति में रहेक लगे, जेकार में उके बोलाल जाहे। १<sup>३</sup>का तोके दास केर रूप में बोलाल जाहे? तोयं ईकार चिंता न कर। किन्तु यदि तोयं स्वतन्त्र होए सकबे होले आगे बढ़ आउर अवसर केर लाभ उठाओ। १<sup>४</sup>काहेकि जेके प्रभु केर दास केर रूप में बोलाल जाहे, उ तो प्रभु केर स्वतन्त्र व्यक्ति हेके। येहे रकाम जेके स्वतन्त्र व्यक्ति केर रूप में बोलाल जाहे, उ मसीह केर दास हेके। १<sup>५</sup>परमेश्वर कीमत चुकाए के तोहरे के खरीदे। ईकार लागिन मनुष्यमान केर दास न बना। १<sup>६</sup>हे भाईमान, तोहरे के जे भी स्थिति में बोलाल जाहे, परमेश्वर केर सामने ओहे स्थिति में रहा।

### विवाह करेक सम्बन्ध में प्रश्नमान केर उत्तर

१<sup>७</sup>अविवाहितमान केर सम्बन्ध में प्रभु केर ओर से मोके कोनो आदेश नी मिले। ईकार लागिन मोंयं प्रभु केर दया प्राप्त कईरके विश्वासी होवेक केर कारण अपन राय देवाथों। १<sup>८</sup>मोंयं सोचोना कि ई वर्तमान संकट केर कारण येहे अच्छा आहे कि कोनो व्यक्ति मोर समान एकलाए रहोक। १<sup>९</sup>यदि तोहरे विवाहित आहा होले उकार से छुटकारा पावेक केर यत्न न करा। यदि तोहरे स्त्री से मुक्त होहा होले उके न खोजा। १<sup>१०</sup>किन्तु यदि तोहरे केर जीवन विवाहित आहे होले तोहरे कोनो पाप नी कईरा। आउर यदि कोनो कुंवारी कन्या विवाह करेला, होले कोनो पाप नी करेला किन्तु ऐसान आदमीमान शारीरिक कष्ट उठाबाँए जेकार से मोंयं तोहरे के बचाएक खोजाथों।

१<sup>११</sup>हे भाईमान, मोंयं तो येहे कहाथों, समय बहुत थोड़ा आहे। ईकार लागिन एकान से आगे, जेकार जेकार ठिन पत्नि आहाँए, उमान ऐसान रहोक, माईन लेवा उमान केर ठिन पत्निए नैखाँए। १<sup>१२</sup>आउर उजेमान कन्दार्थाँए, उमान ऐसान रहोक, जैसान कि केखनों दुखीए नी होहाँए। आउर जेमान आनान्दित आहाँए, उमान ऐसान रहोक, जैसान कि खुशीए नी होहाँए। आउर उजेमान वस्तुमान किन लेवेना, ऐसान रहोक जैसान कि उमान केर ठिन कोनो भी नैखे। १<sup>१३</sup>आउर जेमान सांसारिक सुख-विलास के भोग कराथोंए, उमान ऐसान रहोक, जैसान कि उमान केर वस्तुमान उमान केर लागिन कोनो न लगे। काहेकि ई संसार अपन वर्तमान स्वरूप में नाशामान आहे।

१<sup>१४</sup>मोंयं चाहोना कि तोहरेमान चिंतामान से मुक्त रहा।

एकइन अविवाहित व्यक्ति प्रभु सम्बन्धी विषय केर चिंतन में लईग रहेला कि उ प्रभु के कैसान सन्तुष्ट करी। १<sup>१५</sup>किन्तु एकइन विवाहित व्यक्ति सांसारिक विषयमान मेंहे लिप्त रहेला कि उ अपन पत्नी के कैसान सन्तुष्ट कईर सकी। १<sup>१६</sup>ई रकाम से उकार व्यक्तित्व बाँटीए जाएला। आउर ऐसानेहे कोनो अविवाहित स्त्री या कुंवारी कन्या के जेकार बस प्रभु सम्बन्धी विषयमान केर हे चिंता रहेला। जेकार से उ अपन शरीर आउर अपन आतमा से पवित्र होए सकी। किन्तु एकइन विवाहित स्त्री सांसारिक विषयभोगों में ई रकाम लिप्त रहेला कि उ अपन पति के रिझाते रहेक सकी। १<sup>१७</sup>ईसोउब के मोंयं तोहरे के तोहार भलाई केर लागिन कहाथों तोहार में प्रतिबन्ध लगाएक केर लागिन नई। लेकिन अच्छा व्यवस्था केर हित में आउर ईकार लागिन भी कि तोहरे मन केर चंचलता केर बिना प्रभु में समर्पित होए सकबा।

१<sup>१८</sup>यदि केहो सोचेला कि उ अपन जवान होए चुकाल कुंवारी प्रिया केर प्रति उचित नी कराथे आउर यदि उकार कामभावना तीव्र आहे, तथा नम्रमानइन के आगे बईढ़ के विवाह कईर लेवेक केर दरकार आहे,होले जैसान उ खोजेला, उके आगे बईढ़ के वैसेनेहे कईर लेवेक लगे। उ पाप नी कराथे। उमान के विवाह कईर लेवेक लगे। १<sup>१९</sup>किन्तु जे अपन मन में बहुत पक्का आहे आउर जेकार ऊपरे कोनो दबाव भी नैखे, लेकिन जेकार अपन ईच्छा में भी पूरा ठाईने आउर जेहार अपन मन में पूरा निश्चय कईर लेहे कि उ अपन प्रिया से विवाह नी करी होले उ अच्छाए कराथे। १<sup>२०</sup>सेहेसे उ जे अपन प्रिया से विवाह कईर लेवेला, अच्छाए करेला आउर जे उकार से विवाह नी करेला, उ आउर भी अच्छा करेला।

१<sup>२१</sup>जेखान तक कोनो स्त्री केर पति जीवित आहे, सेखान तक उ विवाह केर बन्धन में बाँधाल रहेला किन्तु यदि उकार पति केर देहान्त होए जाएला, होले जेकार सागें चाही, विवाह करेक, उ स्वतन्त्र आहे किन्तु केवल प्रभु में। १<sup>२२</sup>लेकिन यदि जैसान उ आहे, वैसेनेहे रहीं होले अधिक खुशी रही। ई मोर विचार हेके। आउर मोंयं सोचोना कि मोर में भी परमेश्वर केर आतमा केरे निवास आहे।

### चढ़ावा केर खाना

१<sup>२३</sup>एखान मूर्तिमान में चढ़ाए जवाल बलि केर विषय में हमरे येहे जानिला कि, “हमरे सोभे ज्ञानी हेकि।” ज्ञान आदमीमान के अहंकार से भईर देवेला। किन्तु प्रेम से व्यक्ति अधिक शक्तिशाली बनेला। १<sup>२४</sup>यदि

केहो सोची कि उ थोड़ा जानेला होले जेके जानेक लगे उकार बारे में तो उ एखान कोनोए जाईने नी पाहे। ३यदि केहो परमेश्वर के प्रेम करेना होले उ परमेश्वर केर द्वारा जानाए जाएला।

४सेहेसे मूर्तिमान में चढ़ाए जावाल खाना केर बारे में हमरे जानिला कि ई संसार में वास्तविक प्रतिमा कहाओ नैखे। आउर येहे कि परमेश्वर केवल एकेइज्जन आहे। ५आउर धरती या आकाश में यद्यपि तथाकथित बहुत से “देवता” आहाँए, बहुत से “प्रभु” आहाँए। ६किन्तु हमार लागिन तो एकेइज्जन परमेश्वर आहे, हमार आब्बा। उकरे से सोउब कुछ आवेला। आउर उकरे लागिन हमरे जीईला। प्रभु केवल एकइज्जन आहे, यीशु मसीह। उकरे द्वारा सोउब वस्तुमान केर अस्तित्व आहे आउर उकरे द्वारा हमार जीवन आहे।

७किन्तु ई ज्ञान हर एकइज्जन ठिन नैखे। के के मान जेमान एखान तक मूर्ति उपासना केर आदी हेकाँए, ऐसान वस्तुमान खाएना आउर सोचेना जैसान कि उ वस्तुमान मूर्ति केर प्रसाद हेके। उमान केर ई काम से उमान केर आतमा निर्बल होएक केर कारण दूषित होए जाएला। ८किन्तु उ प्रसाद तो हमरे के परमेश्वर केर निकट नी लेई जाई। यदि हमरे उके नी खाबोई होले कोनो घईट नी जाई आउर यदि खाबोई होले भी कोनो बईद नी जाई।

९सावधान रहा! कहीं तोहरे केर ई अधिकार उमान केर लागिन, जेमान दुर्बल आहाँए, पाप में गिरेक केर कारण न बईन जाओके। १०काहेकि दुर्बल मन केर कोनो व्यक्ति यदि तोर जैसान ई विषय के जाईनेक मूर्ति वाला मन्दिर में खाएक देखी होले उकार दुर्बल मन का उस हद तक नी भटाईक जाई कि उ मूर्ति में बलि चढ़ाए जावाल वस्तुमान के खाएक लगी। ११तोर ज्ञान से, दुर्बल मन केर व्यक्ति केर तो नाश होए जाई तोर ओहे बन्धु केर, जेकार लाई मसीह जान देलाक। १२ई रकाम अपन भाईमान केर विरुद्ध पाप करेक आउर उमान केर दुर्बल मन के चोट पहुँचाएके तोहरे मान मसीह केर विरुद्ध पाप कराथा। १३ईकार लागिन यदि खाना मोर भाई के पाप केर रास्ता में बढ़ाते होले मोंय फिर कभी भी माँस नी खाबों ताकि मोंय अपन भाई केर लागिन, पाप करेक केर प्रेरणा नी बनबों!

### पौलुस भी दोसरे प्रेरितमान जैसाने आहे

१ का मोंय स्वतन्त्र नैखों? का मोंय भी एकइज्जन प्रेरित न लगों? का मोंय हमार प्रभु यीशु मसीह केर दर्शन नी कईरों? का तोहरेमान प्रभु में मोर काम केर परिणाम न लगा? २चाहे दोसरामान केर लागिन मोंय प्रेरित नी भी

लगों — होले भी मोंय तोहार लागिन तो प्रेरित हेकों। काहेकि तोहरे एकटु ऐसान मुहर केर समान हेका जे प्रभु में मोर प्रेरित होवेक के प्रमाणित करेला।

३उमान जेमान कि मोर जाँच करेक खोजाथाँए, उमान केर प्रति आत्म रक्षा में मोर उत्तर ई हेके: ४का मोके खाएक पीएक केर अधिकार नैखे? ५का मोर ई अधिकार नैखे कि मोंय अपन विश्वासि पत्नी के अपन सागों लेई जाएक? जैसान कि दोसरे प्रेरित, प्रभु केर बन्धु आउर पतरस कईर रहाँए। ६अथवा का बरनावास आउर मोके अपन जीविका केर लागिन कमाएक केर लागिन कोनो काम करेक लगी? ७सेना में ऐसान के आहे जे अपन खर्च में एकइज्जन सिपाही केर रूप में काम करी। अथवा के आहे जे अंगूर के बारी लगाएके भी उकार फल नी चखी? या केहो ऐसान आहाँए जे भेड़मान केर जाँक के देखभाल तो करेला लेकिन उसोउब केर थोड़ा बहुत भी दूध नी पीएला?

८का मोंय मानुष्य केर रूप में ऐसान कहाथों कि? आखिरकार का व्यवस्था केर विधान भी ऐसानेहे नी कहेला जानों? ९मूसा केर व्यवस्था केर विधान में लिखाल आहे, “खलिहान में गारु केर मूँख के न बाँधबा।”<sup>१</sup> परमेश्वर का केवल बैलमान केर बारे में बताथे कि? १०नई! निश्चित रूप से उ ईके का हमार लागिन नी बताथे? हाँ, ईके हमार लाये लिखाल जाए राहे। काहेकि खेत जोतेक वाला कोनो आशा सेहे खेत जोतेक आउर खलिहान में भूसा से अनाज अलग करेक वाला फसल केर थोड़ा भाग पावेक केर आशा तो खेलाए। ११होले यदि मोंय तोहरे केर हित केर लागिन आध्यात्मिकता केर बीज बुनलों होले मोर तोहरे से भौतिक वस्तुमान केर फसल काटेक खोजाथों, ई कोनो बहुत बड़का बात हेके? १२यदि दोसरे मान तोहरे से भौतिक वस्तुमान पावेक केर अधिकार आहे होले मोर तो तोहरे ऊपर का आउर भी अधिक अधिकार नैखे जानों? किन्तु मोंय ई अधिकार केर उपयोग नी कईरों। लेकिन मोंय तो सोउब कुछ सहते आहों ताकि मोंय मसीह केर सुसमाचार केर रास्ता में कोनो बाधा नी बईन जाबों। १३का तोहरे नी जानाला कि जेमान मन्दिर में काम करेना, उमान अपन खाना मन्दिर सेहे पावेना। आउर जेमान नियमित रूप से वेदी केर सेवा करेना, वेदी में चढ़ावा में उमान केर हिस्सा नी होवेला जानों? १४ई रकाम प्रभु व्यवस्था देहे कि सुसमाचार केर प्रचारकमान के आजीविका सुसमाचार केर प्रचार सेहे होवेक लगे।



१५किन्तु ई अधिकारमान में से मोंयं एकटु केर भी केखनों प्रयोग नी कईरों। आउर ई बातमान के मोंयं ईकार लागिन नी लिखलों कि ऐसान कोनो मोर विषय में कराल जाओक। बजाय ईकार कि केहो मोर से उ बात के छीन लेओक जेकार मोके गर्व आहे। ईकार से तो मोंयं मोईर जाएके ठीक समझबों। १६ईकार लागिन यदि मोंयं सुसमाचार केर प्रचार करारथों होले ईकार में मोर गर्व करेक केर कोनो करण नैखे काहेकि मोर तो ईटु कर्तव्य हेके। आउर यदि मोंयं सुसमाचार केर प्रचार नी करबों होले मोर लागिन ईटु कितना बुरा होई। १७आउर यदि ईके मोंयं अपन ईच्छा से करारथों होले मोंयं ईकार फल पावेक योग्य हेकों, किन्तु यदि अपन ईच्छा से नई लेकिन केकरो नियुक्ति केर कारण ई काम मोके सौपाल जाहे १८होले फिर मोर प्रतिफल का लागिन। ईकरे लागिन जेखान मोंयं सुसमाचार केर प्रचार करबों होले बिना कोनो मूल्य लेईके उके करबों। ताकि सुसमाचार केर प्रचार में जे कुछ पावेक केर मोर अधिकार आहे, मोंयं उकार पूरा उपयोग नी करबों।

१९यद्यपि मोंयं कोनो भी व्यक्ति केर बन्धन में नैखों, फिर भी मोंयं निजे के तोहरे सोउब कर सेवक बनाए लेहों। ताकि मोंयं अधिकतर आदमीमान के जीत सकबों। २०यहूदीमान केर लागिन मोंयं एकझन यहूदी जैसान बनलों, ताकि मोंयं यहूदीमान के जीत सकबों। जेमान व्यवस्था केर विधान केर अधीन आहाँए, उमान केर लागिन मोंयं एकझन ऐसान व्यक्ति बनलों जेमान व्यवस्था केर विधान केर अधीन जैसान आहाँए। यद्यपि मोंयं निजे व्यवस्था केर विधान केर अधीन नैखों। ईके मोंयं ईकार लागिन करलों कि मोंयं व्यवस्था केर विधान केर अधीनमान के जीत सकबों। २१मोंयं एकझन ऐसान व्यक्ति भी बनलों जे व्यवस्था केर विधान के नी मानोना। यद्यपि मोंयं परमेश्वर केर व्यवस्था से रहित नैखों लेकिन मसीह केर व्यवस्था केर अधीन आहों। ताकि मोंयं जे व्यवस्था केर विधान के नी मानोना उमान के जीतेक पारबों। २२जेमान दुर्बल आहाँए, उमान केर लागिन मोंयं दुर्बल बनलों ताकि मोंयं दुर्बलमान के जीत सकबों। सोउब कर लागिन मोंयं सोभे केर जैसान बनलों ताकि हर सम्भव उपाय से उमान केर उद्धार करेक पारबों। २३ई सोउब कुछ मोंयं सुसमाचार केर लागिन करारथों ताकि ईकार वरदानमान में मोर भी थोड़ा भाग होक।

२४का तोहरे मान ईके नी जानाला कि खेल केर मैदान में कुदेक तो सोभे पावेना किन्तु पुरस्कार कोनो एकझन केहे मिलेला। एसान कुदा कि जीत तोहरेहे होक। २५कोनो खेल प्रतियोगिता में प्रत्येक प्रतियोगी के हर रकाम

केर आत्मसंयम करेक होवेला। उमान एकटु नाशमान जयमाल से सम्मानित होवेक केर लागिन ऐसान कराएना किन्तु मोंयं तो एकटु अविनाशी मुकुट के पावेक केर लागिन ईके करोना। २६ई रकाम मोंयं उ व्यक्ति केर समान कुदोना जेकार सामने एकटु लक्ष्य आहे। मोंयं हवा में मुक्का नी मारोना। २७लेकिन मोंयं तो अपन शरीर के कटोर अनुशासन में तईप के, उके अपन वश में करोना। ताकि कहीं ऐसान न होए जाओक कि दोसरामान के उपदेश देवेक केर पिछे परमेश्वर केर द्वारा मोंये व्यर्थ ठहराए देवाल जाबों।

### यहूदीमान जैसान न बना

१० हे भाईमान, मोंयं खोजोना कि तोहरेमान ईके जाईन लेवा कि हमार सोभे पूर्वज बादल केर छत्र छाया में सुरक्षा पूर्वक लाल सागर पार कईर जाई रहाँए। २उ सोउब के बादल केर नीचे, समुद्र केर बीच मूसा केर अनुयायिमान केर रूप में बपतिस्मा देवाल जाए राहे। ३उ सोभे कोई समाने आध्यात्मिक भोजन खाए रहाँए। ४आउर समान आध्यात्मिक पानी पि रहाँए काहेकि उमान अपन सागें चलते रहाल उ आध्यात्मिक चट्टान सेहे पानी ग्रहण कईर रहाँए। आउर उ चट्टान राहे मसीह। ५किन्तु उमान में से अधिकांश आदमीमान से परमेश्वर प्रसन्न नी राहे, ईकार लागिन उमान मरुभूमि में माराल गेलाँए।

६ई घटना ईकार लागिन घटलक कि हमार लागिन उदाहरण सिद्ध होक आउर हमरे बुरा बातमान केर कामना नी करबोई जैसान उमान कईर रहाँए। ७मूर्ति-पूजक न बना, जैसान कि उमान में से थोड़ा रहाँए। शास्त्र कहेला: “व्यक्ति खाएक पीएक केर लागिन बैठलक आउर परस्पर आनन्द मनाएक केर लागिन उठलक।” ८सेहेसे आवा हमरे केखनों व्यभिचार नी करबोई जैसान उमान में से के केमान करात रहाँए। ईकरे लागिन उमान में से २३,००० व्यक्ति एके दिने मोईर गेलाँए। ९आवा हमरे मसीह<sup>७</sup> केर परीक्षा न लेबोई, जैसान कि उमान में से के केमान लेई रहाँए। परिणामस्वरूप साँपमान केर डसेक से उमान मोईर गेलाँए। १०चुगली शिकायत न करा जैसान कि उमान में से के केमान करात रहाँए आउर ईकरे लागिन विनाश केर सोरगादूत द्वारा मोराए देवाल गेलाँए।

११ई घटना उमान केर सागें ऐसान घटलक कि उदाहरण रहोक। आउर उमान के लिख देवाल गेलाक कि हमार लागिन जेमान में युगमान केर अन्त उताईर राहे, चैतावनी

७ १०:१ मसीह कोनो यूनानी प्रतिमान में आहे, “प्रभु।”

रहोक। १२ईकार लागिन जेमान ईके सोचाथा कि उ दृढ़ता केर सागें खड़ा आहे, उकार से सावधान रहेक लगी कि उ गिर न जाओक। १३तोहरे कोनो ऐसान परीक्षा में न पर्ईडा, जे मनुष्यमान केर लागिन सामान्य नैखे। परमेश्वर विश्वसी आहे। उ तोहरे केर सहन शक्ति से अधिक तोहरे के परीक्षा में नी पड़ेक देई। परीक्षा केर सागें सागें उकार से बचेक केर मार्ग भी उ तोहरे के देई ताकि तोहरे परीक्षा में उत्तीर्ण होवेक सकबा।

१४हे मोर प्रिय सर्गीमान, अंत में मोंयं कहाथों मूर्ति उपासना से दुरे रहा। १५तोहरे के समझदार समझ के मोंयं ऐसान कहाथों। जेसोउब के मोंयं कहाथों, उके अपने अपने में परखा। १६धन्यवाद केर उ प्याला जेकार लागिन हमरे धन्यवाद देवीला, उ का मसीह केर लहू में हमार साझेदारी न लगे? उ रोटी जेके हमरे ठुकड़ा करिला, का यीशु केर देह में हमार साझेदारी नैखे?

१७रोटी केर होएक एकटु ऐसान तथ्य हेके, जेकार अर्थ हेके कि हमरे सोउब एके शरीर से हेकि। काहेकि उ एक रोटी में हमरे सोउब साझेदार आही।

१८उ ईसाएलिमान केर बारे में सोचा, जेमान बलि केर वस्तुमान खाएना। का उमान उ वेदी केर साझेदार न लगाए? १९ई बात के मोर कहेक केर का प्रयोजन आहे? का मोंयं ईके कहेक खोजाथों कि मूर्तिमान में चढ़ाल भोजन कोनो हेके या कि मूर्ति कोनो भी न लगे? २०लेकिन मोर आशा तो ईटु हेके कि उ अधर्मी जेमान बलि चढ़ाएना, उमान उके परमेश्वर केर लागिन नई, लेकिन दुष्ट आतमामान केर लागिन चढ़ाएना। आउर मोंयं नी खोजोना कि तोहरे दुष्टात्मानान केर साझेदार बना। २१तोहरे प्रभु केर कटोरा आउर दुष्टात्मानान केर कटोरा में एके सागें नी पीएक सकबा। तोहरे प्रभु केर भोजन केर चौकी आउर दुष्टात्मानान केर भोजन केर चौकी, नग्रमान में एके सागें हिस्सा नी बटाएक सकबा। २२का हमरे प्रभु के चिड़ाएक खोजाथि? का जेतना शक्तिशाली उ आहे, हमरे उकार से अधिक शक्तिशाली आहि?

### अपन स्वतन्त्रता केर प्रयोग परमेश्वर केर महिमा केर लागिन करा

२३जैसान कि कहाल जाहे कि, “हमरे कोनो भी करेक केर लागिन स्वतन्त्र आहि।” लेकिन सोउब कुछ केर हितकारी तो नैखी। “हमरे कोनो भी करेक केर लागिन स्वतन्त्र आही” किन्तु हर कोनो बात से विश्वास सुदृढ़ तो नी होवेला। २४केखो भी मात्र स्वार्थ केर चिन्ता नी करेक लगे लेकिन दोसरामान केर परमार्थ के भी सोचेक लगे।

२५बाजार में जे कुछ बेचाएला, अपन अन्तर्मन केर अनुसार उ सोउब के खावा। उकान बारे में कोनो प्रश्न न करा। २६काहेकि शास्त्र कहेला: “ई धरती आउर ईकार में जे कुछ आहे, सोउब प्रभु केर हेके।”<sup>१</sup>

२७यदि अविश्वासिमान में से कोनो व्यक्ति तोहरे के भोजन में बोलाबाँए आउर तोहरे हुवाँ जाएक खोजबा होले तोहरे केर सामने जे भी परासाल जाहे, अपन अन्तर्मन केर अनुसार सोउब के खावा। कोनो प्रश्न न पूछा। २८किन्तु यदि केहो तोहरे के ईके बताबाँए कि, “ईटु देवता में चढ़ाल चढ़ावा हेके” होले जेहार तोहरे के ईके बताहे, उकार कारण आउर अपन अन्तर्मन केर कारण उके न खाबा।

२९मोंयं जेखान अन्तर्मन कहाथों होले मोर अर्थ तोहरे केर अन्तर्मन से नई लेकिन उ दोसरा व्यक्ति केर अन्तर्मन से हेके। एकमात्र येहे कारण हेके। काहेकि मोर स्वतन्त्रता भला दोसरे व्यक्ति केर अन्तर्मन द्वारा लेवाए जावाल निर्णय से सीमित काहे रही? ३०यदि मोंयं धन्यवाद देईके, भोजन में हिस्सा लेवाथों होले जे वस्तु केर लागिन मोंयं परमेश्वर के धन्यवाद देवाथों, उकार लागिन मोर आलोचना नी करेक लगे।

३१ईकार लागिन चाहे तोहरे खावा, चाहे पिया, चाहे कोनो आउर करा, बस सोउब कुछ परमेश्वर केर महिमा केर लागिन करा। ३२यहूदीमान केर लागिन या गैर यहूदीमान केर लागिन या जेमान परमेश्वर केर कलीसिया केर हेकाँए, उमान केर लागिन केखनों रुकावाट न बना ३३जैसान निजे हर रकाम से हर एकझन के खुशी रखेक केर जतन करोना, आउर बिना ईके सोईच के कि मोर स्वार्थ का आहे, परमार्थ केर सोचोना ताकि उमान केर उद्धार होक।

**११** १सेहेसे तोहरे मान वैसानेहे मोर अनुसरण करा जैसान मोंयं मसीह केर अनुसरण करोना।

### अधीन रहेक

३४मोंयं तोहरे केर प्रशंसा कराथों। काहेकि तोहरे मोके हर समय याईद करते रहाला: आउर जे शिक्षामान मोंयं तोहरे के देई हों, उसोउब के सावधानी से पालन करते आहा। ३५लेकिन मोंयं खोजोना कि तोहरे ईके जाईन लेवा कि स्त्री केर सिर पुरुष हेके, पुरुष केर सिर मसीह हेके, आउर मसीह केर सिर परमेश्वर हेके।

३६हर ऐसान पुरुष जे सिर ढईक के प्रार्थना करेला या परमेश्वर केर ओर से बोलेला, उ परमेश्वर केर अपमान करेला जे अपन सिर हेके। ३७लेकिन हर ऐसान स्त्री जे बिना

सिर ढईक के प्रार्थना करेला या जनसमुह में परमेश्वर केर ओर से बोलेला, उ अपन पुरुष केर अपमान करेला जे उकार सिर हेके। उ ठीक उझन स्त्री केर समान हेके जेहार अपना सिर मुँडवाए देईहे। १५यदि कोनो स्त्री अपन सिर नी ढपेला होले उ अपन केशं के भी काहे नी मुँडवाए लेवेला। किन्तु यदि स्त्री केर लागिन केशं मुँडवाएक लाज केर बात हेके होले उके अपन सिर भी ढकेक लगे।

१६किन्तु पुरुष केर लागिन अपन सिर ढकेक उचित न लगे काहेकि उ परमेश्वर केर स्वरूप आउर महिमा केर प्रतिबिम्ब हेके। किन्तु एकझन स्त्री अपन पुरुष केर महिमा केर प्रतिबिम्ब करेला। १७मोंय ऐसान ईकार लागिन कहाथों काहेकि पुरुष कोनो स्त्री से नई, लेकिन स्त्री पुरुष से बईने। १८पुरुष स्त्री केर लागिन नी रचाल जाहे लेकिन स्त्री केर रचना पुरुष केर लागिन कराल जाहे। १९ईकार लागिन परमेश्वर उके जे अधिकार देईहे, उकार प्रतीक रूप में स्त्री के अपन सिर ढकेक लगे। उके सोरगदूतमान केर कारण भी ऐसान करेक लगे।

२०फिर भी प्रभु में न तो स्त्री पुरुष से स्वतन्त्र आहे आउर न ही पुरुष स्त्री से। २१काहेकि जैसान पुरुष से स्त्री आलाक, वैसानेहे स्त्री पुरुष के जन्म देलाक। किन्तु सोउब कोई परमेश्वर से आवेना। २२निजे निर्णय करा। का जनसमुह केर बीच एकझन स्त्री के सिर उघड़ाए के परमेश्वर केर प्रार्थना करेक अच्छा लगेला? २३का निजे प्रकृति तोहरे के नी सिखाएला कि यदि कोनो पुरुष अपन केशं लम्बा बढेक देई होले ई उकार लागिन लाज केर बात हेके, २४आउर एकझन स्त्री केर लागिन येहे उकार शोभा हेके? वास्तव में उके उकार लम्बा केशं एकठु प्राकृतिक ओढ़नी केर रूप में देवाल जाहे। २५एखान ईकार में यदि केहो विवाद करेक खोजबाँए होले मोके कहेक होई कि न तो हमार हियाँ कोनो ऐसान प्रथा आहे आउर न ही परमेश्वर केर कलीसिया में।

### प्रभु केर भोज

२६एखान ई अगला आदेश देईके मोंयं तोहरे केर प्रशंसा नी कराथों काहेकि तोहरे केर आपस में मिलेक तोहरे केर भला होवेक केर बजाय तोहरे के हानि पहुँचाये। २७सोउबसे पहिले येहे कि मोंयं सुनलों कि तोहरे मान सभा में जेखान परस्पर मिलाला होले तोहरे केर बीच मतभेद रहेला। थोड़ा बहुत मोंयं ईकार में विश्वास भी करोना। २८आखिरकार तोहरे केर बीच मतभेद भी होबे घारी। जेकार से कि तोहरे केर बीच में जे उचित ठहराय जवाल जाहे, उठु सामने आए जाओक।

२९सेहेसे जेखान तोहरे आपस में ईकट्टा होवाला होले सचमुच प्रभु केर भोज पावेक केर लागिन ईकट्टा नी होवाला, ३०लेकिन जेखान तोहरे भोज ग्रहण कराला होले तोहरे में से हर एकझन आगे बईद के अपन खाएक में दूईट पड़ला। आउर बस कोनो व्यक्ति तो भूखे चईल जाएना, आउर कोनो व्यक्ति अत्यधिक खाए-पी के मस्त होए जाएना। ३१का तोहार टिन खाएक पीएक केर लागिन अपन घर नैखे कि। अथवा ई रकाम तोहरे परमेश्वर केर कलीसिया के अनादर नी कराथा? आउर जेमान दीन आहाँए उमान के तिरस्कार करेक केर चेष्टा नी कराथा जानों? मोंयं तोहरे के का कहबों? ईकार लागिन का मोंयं तोहरे केर प्रशंसा करबों। ई विषय में मोंयं तोहरे केर प्रशंसा नी करबों।

३२काहेकि जेसोउब शिक्षा मोंयं तोहरे के देई हों, उसोउब मोके प्रभु से मिल राहे। प्रभु यीशु उ राईत के, जेखान उके मरोए देवेक केर लागिन धारुवाए जाए राहे, एकठु रोटी लेलाक ३३आउर धन्यवाद देक केर पिछे उ उठुके टुकड़ा करलाक आउर कहलक, “ईतु मोर शरीर हेके, जेतु तोहरे केर लागिन हेके। मोके याईद करेक केर लागिन तोहरे ऐसानेहे करबा।”

३४उमान केर भोजन कईर चुकेक केर पिछे येहे रकाम उ प्याला उठालक आउर कहलक, “ई प्याला मोर लहू केर द्वारा कराल जवाल एकठु नौतून प्रतिज्ञा हेके। जेखान भी तोहरे ईके पिबा सेखाने मोके याईद करेक केर लागिन ऐसानेहे करबा।” ३५काहेकि जेतना बार भी तोहरे ई रोटी के खाबा आउर ई प्याला के पीते रहबा, उनेहे बार जेखान तक उ आए नी जाई, तोहरे प्रभु केर मृत्यु केर प्रचार कराथा।

३६अतः जे केहो भी प्रभु केर रोटी या प्रभु केर प्याला के अनुचित रीति से खाएला या पीएला, उ प्रभु केर देह आउर उ लहू केर प्रति अपराधी होई। ३७व्यक्ति के उ पहिले अपन के परखोक आउर पिछे ई रोटी के खाओक आउर ई प्याला के पीओक। ३८काहेकि प्रभु केर देह केर अर्थ बिना समईझ के जे ई रोटी के खाएला आउर ई प्याला के पीएला, उ ई रकाम खाए-पी के अपन ऊपरे दण्ड के बोलाएला। ३९ईकरे लागिन तो तोहरे में से बहुत कोई दुर्बल आहाँए, बीमार आहाँए आउर बहुत कोई तो चिरनिद्रा में निन्दाए गेलाँए। ४०किन्तु यदि हमरे अपन के अच्छा से परईख लेई रहती होले हमरे के प्रभु केर दण्ड नी भोगेक पड़ताक। ४१प्रभु हमरे के अनुशासित करेक केर लागिन दण्ड देवेला। ताकि हमरे संसार केर सागें दंडित नी कराल जाएक लागिन।

४२ईकार लागिन हे मोर भाईमान, जेखान भोजन करेक तोहरे ईकट्टा होवाला होले परस्पर एक दोसरे केर प्रतीक्षा

करा। ३५यदि सचमुच केखो बहुत भूख लईगहे होले उके घर में हे खाए लेवेक लगे ताकि तोहरे केर एकत्र होवेक तोहार लागिन दण्ड केर कारण न बनोक। अर्थात्; दोसरा बातमान के जेखान मोंयं जाबों, सेखान सुलझाबों।

### पवित्र आतमा केर वरदान

# १२

हे भाईमान, एखान मोंयं नी चाहोना कि तोहरे आतमा केर वरदानमान केर विषय में अनजान रहा। १तोहरे जानाला कि जेखान तोहरे अधर्मी रहा सेखान तोहरे के गूंगा जड़ मूर्तिमान केर ओर जैसान भटकाल जात राहे, तोहरे वैसानेहे भटकत रहा। २सेहेसे मोंयं तोहरे के बतायों कि परमेश्वर केर आतमा केर ओर से बोलेक वाला केहो भी ईके नी कहेना, “यीशु के शाप लगेक” आउर पवित्र आतमा केर द्वारा कहेक वाला के छोईड के न केहो ईके कहेक सकेना कि, “यीशु प्रभु हेके।”

३हर एकझन के आतमा केर अलग-अलग वरदान मिल्हे। किन्तु उसोउब के देवेक वाला आतमा तो एके हेके। ४सेवा अनेक प्रकार केर निश्चित कराल जाहे किन्तु हमरे सोउब जेकार सेवा करिला, उ प्रभु तो एकझन हेके। ५काम-काज तो बहुत से बताल जाहे किन्तु सोभे केर बीच सोउब काममान के करेक वाला उ परमेश्वर तो एकेझन हेके।

६हर एकझन में आतमा कोनो न कोनो रूप में प्रकट होवेला जे हर एकझन केर भलाई केर लागिन होवेला। ७केखो आतमा केर द्वारा परमेश्वर केर ज्ञान से युक्त होएके बोलेक केर योग्यता देवाल जाहे तो केखो ओहे आतमा द्वारा दिव्य ज्ञान केर प्रवचन केर योग्यता देवाल जाहे। ८आउर केखो ओहे आतमा केर द्वारा विश्वास केर वरदान देवाल जाहे तो केखो चंगा करेक केर क्षमता ओहे आतमा केर द्वारा देवाल जाहे। ९आउर कोनो अन्य व्यक्ति के आश्चर्यपूर्ण शक्ति देवाल जाहे तो केहो दोसरा के परमेश्वर केर ओर से बोलेक केर सामर्थ्य देवाल जाहे। आउर केखो मिल्हे भला बुरा आतमामान केर अंतर के चिन्हेक केर शक्ति। केखो अलग-अलग भाषामान बोलेक केर शक्ति प्राप्त होहे, तो केखो भाषामान केर व्याख्या कईर के उकार अर्थ निकलाएक केर शक्ति। १०किन्तु ई ओहे एकठु आतमा हेके जेठु जेके-जेके जैसान-जैसान ठीक समझेला, देईके, ई सोउब बातमान के पूरा करेला।

### मसीह केर देह

१जैसान हमार में से हर एक केर शरीर तो एके आहे, लेकिन उकार में अंग अनेक आहे। आउर यद्यपि अंगमान केर अनेक रई के भी उमान से देह एकठुवे बनेला,

वैसानेहे मसीह हेके। २काहेकि चाहे हमरे यहूदी हेकी, चाहे गैर यहूदी, सेवक हेकि या स्वतन्त्र। एके देह केर विभिन्न अंग बईन जाएक केर लागिन हमरे सोउब कोई के एके आतमा द्वारा बपतिस्मा देवाल जाहे आउर प्यास बुझाएक केर लागिन हमरे सोउब कोई के एके आतमा प्रदान कराल गेलाक।

३एखान देखा, मानव शरीर कोनो एकठु अंग से तो नी बईने, लेकिन उकार में बहुत से अंग होवेला। ४यदि गोढ़ कही, “काहेकि मोंयं हाथ न लगों, ईकार लागिन मोर शरीर से कोनो सम्बन्ध नैखे” होले ईकार लागिन का उ शरीर केर अंग नी रही। ५येहे रकाम यदि कान कही, “काहेकि मोंयं आँईख न लगों, ईकार लागिन मोंयं शरीर केर न लगों” होले का ई कारण से उ शरीर केर नी रही। ६यदि एकठु आँईखे सोउब शरीर होताक होले कहाँ से सुनेक होताक? यदि काने सोउब शरीर होताक होले कहाँ से सुधेक होताक? ७किन्तु वास्तव में परमेश्वर जैसान ठीक समझलक, हर अंग के शरीर में वैसानेहे जगह देलाक। ८सेहेसे यदि शरीर केर सारा अंग एके जैसान होए जाताक होले शरीर कहाँ होताक। ९किन्तु स्थिति ई हेके कि अंग तो अनेक होवेला किन्तु शरीर एके रहेला।

१०आँईख हाथ से ईके नी कहेक सकेला, “मोके तोर दरकार नैखे कईके।” या ऐसानेहे सिर, गोढ़ से नी कहेक सकेला, “मोके तोर दरकार नैखे कईके।” ११ईसोउब केर बिल्कुल विपरीत शरीर केर जे अंगमान के हमरे दुर्बल समझिला, उसोउब बहुत आवश्यक होवेला। १२आउर शरीर केर जे अंगमान के हमरे कमती आदरणीय समझिला, उसोउब के हमरे अधिक ध्यान रखीला। आउर हमार गुप्त अंग आउर अधिक शालीनता पाए जाएला। १३जबकि हमार प्रदर्शनीय अंगमान के ई रकाम केर उपचार केर दरकार नी होवेला। किन्तु परमेश्वर हमार शरीर केर रचना ई ढंग से कईर जेकार से उ अंगमान के जेसोउब कमती सुन्दर आहे आउर अधिक आदर प्राप्त होक। १४ताकि देह में कहीं कोनो फूट न पड़ोक लेकिन देह केर अंग परस्पर एक दोसरे केर समान रूप से ध्यान रखोक। १५यदि शरीर केर कोनो एकठु अंग दुख पावेला होले उकार सागें शरीर केर आउर सोभे अंग दुखी होवेला। यदि कोनो एकठु अंग केर मान बढ़ेला होले सोभे अंग हिस्सा बाटाएना।

१६येहे रकाम तोहरे सोभे मान मसीह केर शरीर हेका आउर अलग-अलग रूप में उकार अंग हेका। १७ईतनाए नई परमेश्वर कलीसिया में पहिले प्रेरितमान के, दोसरा नबिमान के, तीसरा उपदेशकमान के, फिर आश्चर्यकर्म

करेक वालामान के, फिर चंगा करेक केर शक्ति से युक्त व्यक्तिमान के, फिर उमान के जेमान दोसरामान के सहायता करेना, प्रस्थापित कइरे, फिर अगुवाई करेक वालामान के आउर फिर उ आदमीमान के जेमान विभिन्न भाषामान बोईल सकेना। २९का ईमान सोभेमान प्रेरित हेकाँए? ईमान सोभे का नबी हेकाँए? का ईमान सोभे उपदेशक हेकाँए? का ईमान सोभे आश्चर्यकार्य करेना? ३०का ईमान सोउब कोई केर टिन चंगा करेक केर शक्ति आहे? का ईमान सोभे दोसरा भाषामान बोलेना? का ईमान सोभे अन्यभाषामान केर व्याख्या करेना? ३१हाँ, किन्तु तोहरे आतमा केर आउर बड़का वरदान पावेक केर लागिन यत्न करते रहा। आउर ई सोउब केर लागिन उत्तम डहर तोहरे के एखान मोंग्रं देखाबों।

### प्रेम महान हेके

**१३** १यदि मोंग्रं मनुष्यमान आउर सोरगदूतमान केर भाषा तो बोलेक सकबों किन्तु मोर में प्रेम नी रही, होले मोंग्रं एकठु बजते रहाल कसाँ या झंकारेक वाला झाँझ मात्र हेकाँ। २यदि मोर में परमेश्वर केर ओर से बोलेक केर शक्ति आहे आउर मोंग्रं परमेश्वर केर सोभे रहस्यमान के जानोना तथा समूचा दिव्य ज्ञान भी मोर टिन होई आउर ईतना विश्वास भी मोर में होई कि पहाड़मानो के अपन जगह से सरकाएक सकबों, किन्तु मोर में प्रेम नी रही ३होले मोंग्रं कोनो न लगों। यदि मोंग्रं अपन सारा सम्पत्ति थोड़ा-थोड़ा कइरे के जरूरत मन्दवालामान केर लागिन दान करबों आउर चाहे अपन शरीर तक के जलाए देवेक केर लागिन सौँईप देबों किन्तु यदि मोंग्रं प्रेम नी करोना होले। ईकार से मोर भला होवेक वाला नैखे।

४प्रेम धैर्यपूर्ण हेके, प्रेम दयामय हेके, प्रेम में ईर्ष्या नी होवेला, प्रेम अपन प्रशंसा आपन से नी करेला। ५उ अभिमानी नी होवेला। उ अनुचित व्यवहार केखनों नी करेला, उ स्वार्थी नैखे, प्रेम केखनो नी झुँझलाएला, उ बुराईमान केर कोनो लेखा-जोखा नी रखेला। ६बुराई में केखनों उके खुशी नी होवेला। उ तो दोसरामान केर सागें सच्चाई में आनंदित होवेला। ७उ सोभे समय रक्षा करेला, उ सोउब समय विश्वास करेला। प्रेम सोउब समय आशा से पूर्ण रहेला। उ सहनशील हेके।

८प्रेम अमर हेके। जबकि भविष्यवाणी केर सामर्थ्य तो समाप्त होए जाई, दोसरा भाषा के बोलेक केर क्षमता युक्त जीभ एक दिन चुपे होए जाई, दिव्य ज्ञान केर उपहार जाते रही, ९काहेकि हमार ज्ञान तो अधूरा आहे, हमार

भविष्यवाणियाँ संपूर्ण नैखे। १०किन्तु जेखान पूर्णता आए होले उ अधूरापन चईल जाई।

११जेखान मोंग्रं छोटो राहो होले एकझन छौवा केर रकाम बोलात राहों, वैसानेहे सोचात राहों आउर ओहे रकाम सोच विचार करत राहों, किन्तु एखान मोंग्रं बड़का होएके पुरुष बईन जाहों, होले उ बचपन केर बातमान जाते आहे। १२काहेकि एखान तो दर्पण में हमरे एक धुँधला सा प्रतिबिंब देईख पवाथी किन्तु पूर्णता प्राप्त होए जाई होले हमरे पूरा भाल से आमने-सामने देईख पाबोई। एखान तो मोर ज्ञान थोड़ा आहे किन्तु समय आवी होले उठु परिपूर्ण होई। वैसानेहे जैसान कि परमेश्वर मोके पूरा भाल से जानेला। १३ई दौरान विश्वास, आशरा आउर प्रेम तो बनाले रही आउर ई तीनों में भी सोउबसे महान हेके प्रेम।

### आध्यात्मिक वरदानमान के

#### कलीसिया केर सेवा में लगावा

**१४** १प्रेम केर मार्ग में प्रयत्नशील रहा। आउर आध्यात्मिक वरदानमान के निष्ठा केर संग अभिलाषा करा। विशेष रूप से परमेश्वर केर ओर से बोलेक केर। २काहेकि जेके दोसरा भाषा में बोलेक केर वरदान मिले, उ तो आसल में आदमीमान से नई लेकिन परमेश्वर से बात कराथे। काहेकि उके केहो समईझे नी पाएना, उ तो आतमा केर शक्ति से रहस्यमय वाणी बोलाथे। ३किन्तु उ जेके परमेश्वर केर ओर से बोलेक केर वरदान प्राप्त होहे, उ आदमीमान के आतमा में दृढ़ता, प्रोत्साहन आउर चैन पहुँचाएक केर लागिन बोलाथे। ४जेके विभिन्न भाषामान में बोलेक केर वरदान प्राप्त होहे उ तो बस अपन आतमा के हे सुदृढ़ कराथे किन्तु जेके परमेश्वर केर ओर से बोलेक केर सामर्थ्य मिले उ समूचा कलीसिया के आध्यात्मिक रूप से सुदृढ़ बनाएला। ५एखान मोंग्रं चाहोना कि तोहरे सोभे दोसरा अनेक भाषामान बोला किन्तु ईकार से भी अधिक मोंग्रं ईके चाहोना कि तोहरे परमेश्वर केर बाटे से बोलेक सका काहेकि कलीसिया केर आध्यात्मिक सुदृढ़ता केर लागिन अपन कहाल केर व्याख्या करेक वाला के छोईड़ के, दोसरा भाषामान बोलेक वाला से परमेश्वर केर ओर से बोलेक वाला बड़का हेके।

६हे भाईमान, यदि दोसरा भाषामान में बोलते मोंग्रं तोहरे टिन आबों होले ईकार से तोहरे केर का भला ही, जब तक कि तोहरे केर लागिन मोंग्रं कोनो रहस्य उद्घाटन, दिव्यज्ञान, परमेश्वर केर सन्देश या कोनो उपदेश नी देबों।

७ऐसान बोलेक तो ऐसान होई जैसान कोनो बाँसुरी या सारंगी जैसान निर्जीव वाद्य केर शुर। यदि कोनो वाद्य केर स्वर में परस्पर स्पष्ट अन्तर नी होएला होले केहो कैसान पता लगाए सकी कि बाँसुरी या सारंगी में कोन सी धुन बजाल जाथे सेके। ८आउर यदि बिगुंल से अस्पष्ट ध्वनि निकलेक लागी होले फिर युद्ध केर लागिन तैयार के होई?

९हे रकाम केहो दोसरा केर भाषा में जेखान तक कि तोहरे साफा-साफा न बोलबा, सेखान तक केहो कैसान समईझ पाबाँए कि तोहरे का कहाथा सेके। काहेकि ऐसान में तोहरे तो बस हवा में बोलेक वाला हे बईन जाबा। १०ईकार में कोनो सन्देह नैखे कि संसार में भाँति-भाँति केर बोलि आहे आउर उमान में से कोनो भी निरर्थक नैखे। ११सेहेसे जेखान तक मोंयं उ भाषा केर जानकार नैखों, सेखान तक बोलेक वाला केर लागिन मोंयं एकझन अजनबी रहबों। आउर उ बोलेक वाला मोर लागिन भी अजनबी ठहरी। १२तोहरे में भी येहे बात लागू होवेला काहेकि तोहरे आध्यात्मिक वरदानमान के पावेक केर लागिन उत्सुक आहा। ईकार लागिन उमान में भरपूर होवेक केर यत्न करा, जेकार से कलीसिया के आध्यात्मिक सुदृढ़ता प्राप्त होक।

१३परिणामस्वरूप जे दोसरा भाषा में बोलेला, उके प्रार्थना करेक लगे कि उ अपन कहाल केर अर्थ भी बताए सकी। १४काहेकि यदि मोंयं कोनो अन्य भाषा में प्रार्थना करबों होले मोर आतमा तो प्रार्थना करते रही किन्तु मोर बुद्धि व्यर्थ रही। १५तो फिर का करेक लागी? मोंयं अपन आतमा से तो प्रार्थना करबों किन्तु सागें अपन बुद्धि से भी प्रार्थना करबों। अपन आतमा से तो उकार स्तुति करबों किन्तु अपन बुद्धि से भी उकार स्तुति करबों। १६काहेकि यदि तोयं केवल अपन आतमा सेहे कोनो आशीर्वाद देबे होले हुवाँ बैठाल कोनो व्यक्ति जे बस सुनाथे, तोर धन्यवाद में “आमीन” कैसान कही काहेकि तोयं जे कहाथिस, उके उ जानबे नी करी। १७अब देख तोयं तो चाहे भली-भाँति धन्यवाद देवाथिस किन्तु दोसरा व्यक्ति के तो उकार से कोनो आध्यात्मिक सुदृढ़ता नी होवाथे।

१८मोंयं परमेश्वर के धन्यवाद देओना कि मोंयं तोहरे सोउब से बईढ़के विभिन्न भाषामान बोईल सकोना। १९किन्तु कलीसिया सभा केर बीच कोनो दोसरा भाषा में दसो हजार शब्द बोलेक केर उपेक्षा अपन बुद्धि केर उपयोग कईके बस पाँच शब्द बोलेक अच्छा समझोना ताकि दोसरामान के भी शिक्षा देई सकबों।

२०हे भाईमान, अपन विचार में बचपना न रहा लेकिन

बुराईमान केर विषय में अबोध छौवामान जैसान बईन रहा। किन्तु अपन चिन्तन में सियाना बना। २१जैसान कि शास्त्र कहेला:

“उमान केर उपयोग कईके

जेमान अन्य बोली बोलेना,

उमान केर मुखमान केर उपयोग कईके जे पराया हेके।

मोंयं ईमान से बात करबों,

लेकिन तब भी ईमान मोर नी सुनबाँए।”

यशायाह २८:११-१२

प्रभु ऐसानेहे कहेला।

२२सेहेसे दोसरा भाषामान बोलेक केर वरदान अविश्वासीमान केर लागिन संकेत हेके न कि विश्वासीमान केर लागिन। जबकि परमेश्वर केर ओर से बोलेक अविश्वासीमान केर लागिन नई, लेकिन विश्वासीमान केर लागिन हेके। २३सेहेसे यदि समूचा कलीसिया एकत्र होएके आउर हर केहो दोसरा-दोसरा भाषामान में बोलबाँए सेखने बाहिरे केर आदमीमान या अविश्वासीमान भीतरे आए जाबाँए होले का उमान तोहरे के पागला नी कहबाँए। २४किन्तु यदि हर एकझन परमेश्वर केर ओर से बोलबाँए आउर सेखान तक कोनो अविश्वासी या बाहिरे केर आए जाबाँए होले का सोउब कोई उके उकार पापमान केर बोध नी कराए देबाँए। सोउब कोई जे कहाथाँए, उकरे में उकार न्याय होई। २५जेखान उकार मन केर भीतरे छिपाल भेद खोलाए जाई तब तक उमान येहे कहबाँए “सचमुच तोहरे केर बीच परमेश्वर आहे” दण्डवत प्रणाम कईके परमेश्वर केर उपासना करबाँए।

**तोहरे केर सभामान आउर कलीसिया**

२६हे भाईमान, तो फिर का करेक लागी? तोहरे जेखान एकट्ठा होवाला होले तोहरे में से कोनो भजन, कोनो उपदेश आउर कोनो आध्यात्मिक रहस्य केर उद्घाटन करेना। केहो कोनो अन्य भाषा में बोलेना होले केहो उकार व्याख्या करेना। ई सोउब बातमान कलीसिया केर आत्मिक सुदृढ़ता केर लागिन कराल जाएक लगे। २७यदि केखो अन्य भाषा में बोलेक आहे होले अधिक से अधिक दुई या तीनझन बोलेक लगे-बारी-बारी, एक-एक कईके। आउर जे कुछ कहाल जाई, एकझन के उकार व्याख्या करेक लगे। २८यदि हुवाँ व्याख्या करेक वाला केहो नैखाँए

होले बोलेक वालाइन के सभा में चुपे रहेक आउर फिर उके अपन से आउर परमेश्वर से हे बात करेक लगे।

११परमेश्वर केर ओर से उकार दूत केर रूप में बोलेक केर जेके वरदान मिले, ऐसान दुई या तीन व्यक्तिमान के हे बोलेक लगे आउर दोसरामान जे कुछ उमान कहाथॉए, उमान उके परखते रहोक। १२यदि हुवाँ कोनो बैठाल मान में कोनो बात केर रहस्य उद्घाटन होई होले परमेश्वर के ओर से बोलोईया पहिला वक्ता के चुपे होए जाएक लगे। १३काहेकि तोहरे एक-एकइन कईके परमेश्वर केर ओर से बोलेक सकला ताकि सोभे आदमीमान सीखोक आउर प्रोत्साहित होक। १४नबीमान केर आतमामान नबीमान केर वश में रहेला। १५काहेकि परमेश्वर अव्यवस्था नैखे, शांति देवेला। जैसान कि सन्तमान केर सोभे कलीसिया में होवेला।

१६स्त्रीमान के सभामान में चुपे रहेक लगे काहेकि उमान के बोलेक केर अनुमति नैखे। लेकिन जैसान कि व्यवस्था केर विधान में भी कहाल जाहे, उमान के दईब के रहेक लगे। १७यदि उमान कोनो के जानेक चाहेना होले उमान घर में अपन-अपन पति के पूछेक लगे काहेकि एकइन स्त्री केर लागिण ई शोभा नी देवेला कि उ सभा में बोलेक केर।

१८का परमेश्वर केर वचन तोहरे से उत्पन्न होहे? या उ मात्र तोहरे तक पहुँईचे? निश्चित नई। १९यदि केहो सोचेना कि उ नबी हेके अथवा उके आध्यात्मिक वरदान प्राप्त होहे होले उके चिन्ह लेवेक लगी कि मोंयं तोहरे के जो कुछ लिखाथॉ, उसोउब प्रभु केर आदेश हेके। २०सेहे यदि केहो ईके नी चिन्ह पाबाँए होले उके भी नी चिन्हाँल जाई।

२१ईकार लागिण हे मोर भाईमान, परमेश्वर केर ओर से बोलेक केर तत्पर रहा तथा दोसरा भाषामान में बोलेक वालामान के भी न रोका। २२किन्तु ई सोभे बातमान सही ढंग से आउर व्यवस्थानुसार करेक लगे।

### यीशु केर सुसमाचार

१५ हे भाईमान, एखान मोंयं तोहरे के उ सुसमाचार केर याईद दिलाएक खोजाथॉ जेके मोंयं तोहरे के सुनाए राहॉ आउर तोहरे भी जेके ग्रहण कईर रहा आउर जेकार में तोहरे निरन्तर स्थिर राहेले आहा। २आउर जेकार द्वारा तोहरे केर उद्धार भी होवाथे तोहरे उ कथामान के जेमान के मोंयं तोहरे के आदेश देई राहॉ, अपन में दृढ़ता से थाईम रखा। (नी होले तोहरे केर विश्वास धारण करेके बेकार होए जाई।)

३जे सर्वप्रथम बात मोकें प्राप्त होए राहे, उके मोंयं तोहरे तक पहुँचाए देलॉ कि शास्त्रमान केर अनुसार: मसीह हमार पापमान केर लागिण मोरलक ४आउर उके दफनाए देवाल गेलाक। आउर शास्त्र कहेला कि फिर तीसरा दिन उके जिलाए के उठाए देवाल गेलाक। ५आउर फिर उ पतरस केर सामने प्रकट होलाक आउर उकार पिछे बारह प्रेरितमान के उ दर्शन देलाक। ६फिर उ पाँच सौ से भी अधिक भाईमान के एके सागें दिखाई देलाक। उमान में से बहुत कोई आईज तक जीवित आहाँए। यद्यपि आधामान केर मृत्यु भी होए चुईके। ७ईकार पिछे उ याकूब केर सामने प्रकट होलाक। आउर तब उ सोभे प्रेरितमान के फिर दर्शन देलाक। ८आउर सोउब से अंत में उ मोकें भी दर्शन देलाक। मोंयं तो समय से पूर्व असामान्य जन्माल संतमासे छौवा जैसान आहॉ।

९काहेकि मोंयं तो प्रेरितमान में सोउबसे छोटो हेकॉ। हियाँ तक कि मोंयं तो प्रेरित कहलाएक योग्य भी नैखें काहेकि मोंयं तो परमेश्वर केर कलीसिया के सताया करात राहॉ। १०किन्तु परमेश्वर केर अनुग्रह से मोंयं वैसान बनलॉ जैसान आईज आहॉ। मोर ऊपरे उकार अनुग्रह बेकार नी गेलाक। मोंयं तो उ सोउब से बईढ़ चईढ़के परिश्रम करलॉ। (यद्यपि उ परिश्रम करेक वाला मोंयं नी राहॉ, लेकिन परमेश्वर केर उ अनुग्रह राहे जे मोर सागें रहात राहे।) ११सेहेसे चाहे तोहरे के मोंयं उपदेश देहॉ चाहे उमान, हमरे सोभे येहे उपदेश देवीला आउर ईकरे में तोहरे विश्वास कईरा।

### हमार पुनर्जीवन

१२किन्तु जेखान कि मसीह के मोरालमान में से पुनरुत्थापित कराल गेलाक होले तोहरे में से के केमान ऐसान काहे कहेला कि मृत्यु केर पिछे फिर से जी उठेक सम्भव नैखे कईके। १३आउर यदि मृत्यु केर पिछे जी उठेक नैखे होले फिर मसीह भी मृत्यु केर पिछे नी जिलाए गेलाक। १४आउर यदि मसीह के नी जिलाए गेलाक होले हमार उपदेश देवेक बेकार हेके आउर तोहरे केर विश्वास भी बेकार हेके। १५आउर मोंयं भी होले परमेश्वर केर बारे में झूठा गवाह ठहरथॉ काहेकि मोंयं परमेश्वर केर सामने कसम खाए के ई साक्षी देहॉ कि उ मसीह के मोरालमान में से जिलालक। किन्तु उमान केर कथन अनुसार यदि मोरालमान में से जिलाए नी गेलाक होले फिर परमेश्वर मसीह के भी नी जिलाहे। १६काहेकि यदि मोरालमान नी जिलाए जाएना होले मसीह के भी नी जिलाल गेलाक। १७आउर यदि मसीह के फिर से जीवित नी कराल जाहे,

फिर तो तोहरे केर विश्वास निरर्थक हेके आउर तोहरे एखान भी अपन अपन पापमान में फँसाला आहा।<sup>१८</sup>हाँ, फिर तो जेमान मसीह केर लागिन अपन प्राण देई देलाँए, उमान यूँ ही नष्ट होलाँए।<sup>१९</sup>यदि हमरे केवल अपन ई भौतिक जीवन केर लागिन यीशु मसीह में अपन आशरा करिरला होले तो हमरे आउर सोभे आदमीमान से अधिक अभागा हेकि।

<sup>२०</sup>किन्तु एखान वास्तविकता ई हेके कि मसीह के मोरालमान में से जिलाल गेलाक। उ मोरालमान के फसह केर पहिला फल हेके।<sup>२१</sup>काहेकि जेखान एकड़न मनुष्य केर द्वारा मृत्यु आलाक होले एकड़न मनुष्य केर द्वारा मृत्यु से पुनर्जीवित होएके उठेक भी होलाक।<sup>२२</sup>काहेकि ठीक वैसानेहे जैसान आदम केर काम केर कारण हर एकड़न केर लागिन मृत्यु आलाक, वैसानेहे मसीह केर द्वारा सोउब कोई के फिर से जिलाए उठाल जाई<sup>२३</sup>किन्तु हर एकड़न के उकार अपन कर्म केर अनुसार सोउबसे पहिले मसीह के, जे फसल केर पहिला फल हेके आउर फिर उ पुनः आगमन में उमान के, जेमान मसीह केर हेकाँए।<sup>२४</sup>ईकार पिछे जेखान मसीह सोभे शासकमान, अधिकारिमान, हर प्रकार केर शक्तिमान केर अंत कईके राज्य के परम आब्बा परमेश्वर केर हाथ में सौँप देवाँए, सेखान प्रलय होए जाई।<sup>२५</sup>किन्तु जेखान तक परमेश्वर मसीह केर शत्रुमान के उकार गोढ़ तले नी कईर देई तब तक उकार राज्य करते रहेक आवश्यक आहो।<sup>२६</sup>सोउबसे अंतिम शत्रु केर रूप में मृत्यु केर नाश कराल जाई।<sup>२७</sup>काहेकि “परमेश्वर हर एकड़न के मसीह केर गोढ़ केर अधीन रईखे।”<sup>२८</sup>एखान देखा जेखान शास्त्र कहाथे, “सोउब कुछ” के उकार अधीन कईर देवाल जाहे। होले जेहार “सोउब कुछ” के उकार चरण केर अधीन कईरहे, उ निजे ईकार से अलग आहे।<sup>२९</sup>आउर जेखान सोउब कुछ मसीह केर अधीन कईर देईहे, होले हिश्राँ तक कि निजे पुत्र के भी उ परमेश्वर केर अधीन कईर देवाल जाई जेहार सोउब कुछ के मसीह केर अधीन कईर देलाक ताकि हर एकड़न केर ऊपरे पूरा भाल से परमेश्वर केर शासन होक।

<sup>३०</sup>नी होले जेमान अपन प्राण देई देलाँए, उमान का करबाँए। यदि मोरालमान कभी पुनर्जीवित होबे नी करेना होले आदमीमान के उकार लागिन बपतिस्मा काहे देवाल जाएला?

<sup>३०</sup>आउर हमरे भी हर घड़ी संकट काहे झेलते रहीला?

<sup>३१</sup>भाईमान। तोहरे केर लागिन मोर उ गर्व जेके मॉयं हमार प्रभु यीशु मसीह में स्थित होवेक केर नाते करोना, उके साक्षी कईरके शपथ पूर्वक कहाथों कि मॉयं रोज दिन मोरोना।<sup>३२</sup>यदि मॉयं ईफ्रिसुस में जंगली पशुमान केर सागें मानवीय स्तर में हे लईई राहों होले उकार से मोके का मिललक। यदि मोरालमान जिलाए नी जाएना, “होले आवा, खाबोई, पीबोई (मौज मनाबोई) काहेकि कईल तो मोईर जाएक आहे।”<sup>३३</sup>

<sup>३३</sup>भटकेक बंद करा: “बुरा संगति से अच्छा आदत नष्ट होए जाएला।”<sup>३४</sup>होश में आवा, अच्छा जीवन अपनवा, जैसान कि तोहरे केर होवेक लगे। पाप करेक बंद करा। काहेकि तोहरे में से के केमान तो ऐसाने आहाँए जेमान परमेश्वर केर बारे में कोनो भी नी जानेना। मॉयं ईके ईकार लागिन कहाथों कि तोहरे लजावा।

### हमरे के कैसान देह मिली ?

<sup>३५</sup>किन्तु केहो पूछेक सकेना कि, “मोराल मान कैसान जिलाए जाएना? आउर उमान फिर कैसान देह धारण कईरके आवेना?”<sup>३६</sup>तोहरे कितना मूर्ख हेका। तोहरे जे बुनाला उठु जेखान तक पहिले मोईर नी जाएला, जीवित नी होवेला।<sup>३७</sup>आउर जहाँ तक जेके तोहरे बुनाला, उकार प्रश्न हेके, होले जे पौधा विकसित होवेला, तोहरे उ भरापुरा पौधा के तो धरती में नी बुनाला। बस केवल बीज बुनाला, चाहे उठु गेहूँ केर दाना होक आउर चाहे कोनो आउर।<sup>३८</sup>फिर परमेश्वर जैसान चाहेला, वैसाने रूप उके देवेला। हर बीज के उ उकार अपन शरीर प्रदान करेला।<sup>३९</sup>सोभे जीवित प्राणिमान केर शरीर एक जैसान नी होवेला। मनुष्यों केर शरीर एक रकाम केर होवेला जबकि पशुमान केर शरीर दोसरा रकाम केर। चराईमान केर देह अलग प्रकार केर होवेला आउर मछरिमान केर अलग।<sup>४०</sup>कोनो देह दिव्य होवेला आउर कोनो पार्थिव किन्तु दिव्य देह केर आभा एक प्रकार केर होवेला आउर पार्थिव शरीरमान केर दोसरा प्रकार केर।<sup>४१</sup>सूरज के तेज एक प्रकार केर होवेला आउर चाँद केर दोसरा प्रकार केर। तारिगानमान में भी एकटु भिन्न प्रकार केर इंजोत रहेला। आउर हाँ, तारिगानमान केर इंजोत भी एक दोसरा से भिन्न रहेला।

<sup>४२</sup>सेहेसे जेखान मोरालमान जी उठबाँए सेखान भी ऐसानेहे होई। उ देह जेके धरती में दफनाए के “बुनाल” जाहे, नाशमान हेके किन्तु उ देह जेकार पुनरुत्थान होहे, अविनाशी हेके।<sup>४३</sup>उ काया जेके धरती में “दफनाए”



जाए राहे, अनादरपूर्ण हेके किन्तु उ काया जेकार पुनरुत्थान होहे, महिमा से मंडित आहे। उ काया जेके धरती में “गाड़ाल” जाहे, दुर्बल हेके किन्तु उ काया जेके पुनर्जीवित कराल जाहे, शक्तिशाली आहे। ४७जे काया के धरती में “दफनाल” जाहे, उठु प्राकृतिक हेके किन्तु जेके पुनर्जीवित कराल जाहे, उ आध्यात्मिक शरीर हेके।

यदि प्राकृतिक शरीर होवेला होले आध्यात्मिक शरीरमान केर भी अस्तित्व आहे। ४८शास्त्र कहेला: “पहिला मनुष्य (आदम) एक सजीव प्राणी बनलक।”<sup>a</sup> किन्तु अंतिम आदम (मसीह) जीवनदाता आतमा बनलक। ४९आध्यात्मिक पहिले नी आवेला, लेकिन पहिले आवेला भौतिक आउर फिर उकार पिछे हे आवेला आध्यात्मिक। ५०पहिले मनुष्य के धरती केर मिट्टी से बनल गेलाक आउर दोसरा मनुष्य (मसीह) सोरग से आलाक। ५१जैसान उ मनुष्य केर रचना मिट्टी से होलाक, वैसानेहे सोभे मान मिट्टी से हे बनलाँए। आउर उ दिव्य पुरुष केर समान अन्य दिव्य पुरुष भी सोरगीय हेकाँए। ५२सेहेसे जैसान हमरे उ मिट्टी से बनल केर रूप धारण करिला, वैसानेहे उ सोरगिक केर रूप भी हमरे धारण करबोई।

५०हे भाईमान, मोंयं तोहरे के ईके बताथो: मांस आउर लहू (हमार ई पार्थिक शरीर) परमेश्वर केर राज्य केर उत्तराधिकारी नी पाए सकी। आउर न ही जे विनाशमान आहे, उ अविनाशी केर उत्तराधिकारी होए सकी। ५१सुना, मोंयं तोहरे के एकठु रहस्यपूर्ण सच बताथो: हमरे सोभे नी मोरबोई, लेकिन हमरे सोउब बदलाए देवाल जाबोई। ५२जेखान अंतिम तुरही बजी सेखान पलक झपकते एक क्षण में ऐसान होए जाई काहेकि तुरही बजी आउर मोरालमान अमर होए के जी उठबाँए आउर हमरे जेमान एखान जीवित आही, बदलाए देवाल जाबोई। ५३काहेकि ई नाशवान देह केर अविनाशी चोले के धारण करेक आवश्यक आहे आउर ई मरणशील काया के अमर चोला धारण कईर लेवेक अनिवार्य आहे। ५४सेहेसे जेखान ई नाशमान देह अविनाशी चोले के धारण कईर लेई आउर उ मरणशील काया अमर चोले के ग्रहण कईर लेई होले शास्त्र केर लिखाल ई वचन पूरा होए जाई:

“विजय पावालझन मृत्यु के निगल ले हे।”

यशायाह २५:८

<sup>a</sup> १५:४५ उद्धरण उत्पत्ति २:७

५५ “हे मृत्यु तोर विजय कहाँ आहे?

ओ मृत्यु, तोर दंश कहाँ आहे?”

होशे १३:१४

५६पाप मृत्यु केर दंश हेके आउर पाप के शक्ति मिलेला व्यवस्था से। ५७किन्तु परमेश्वर केर धन्यवाद होक जे प्रभु यीशु मसीह केर द्वारा हमरे के विजय दिलाएला।

५८सेहेसे मोर प्यारा भाईमान, अटल बईन के डटाल रहा। प्रभु केर कार्य केर प्रति अपन के सोभे समय पूरा भाल से समर्पित कईर देवा। काहेकि तोहरे तो जानाला कि प्रभु में कराल तोहरे केर कार्य व्यर्थ नी जाई।

### दोसरे विश्वासिमान केर लागिन भेंट

**१६** १एखान देखा, संतमान केर लागिन दान ईकट्टा करेक केर बारे में मोंयं गलातिया केर कलीसियामान के जे आदेश देहों तोहरे भी वैसानेहे करा। १हर रविवार में अपन आय में से कोनो न कोनो अपन घर में ईकट्टा करते रहा। ताकि जेखान मोंयं आबों, उ समय दान ईकट्टा करेक न होक। २मोर हुवाँ पहुँचेक में जे कोनो व्यक्ति के तोहरे चाहबा, मोंयं उके परिचय पत्र देईके तोहरे केर उपहार यरूशलेम लेई जाएक केर लागिन भेईज देबों। ३आउर यदि मोर जाएक भी उचित होई होले उ मोर सागें हे चईल जाई।

### पौलुस केर योजनामान

५मोंयं जेखान मकिदुनिया होएके जाबों होले तोहरे टिन भी जाबों काहेकि मकिदुनिया से होएके जाएक केर कार्यक्रम मोंयं निश्चित कईर चुईकें। ६होए सकेला मोंयं थोड़ा समय तोहरे केर सागें ठहरबों या टण्डा के तोहरे केर सागें बिताबों ताकि जहाँ कहीं मोके जाएक होई, तोहरे मोके विदा कईर सकबा। ७मोंयं ईके तो नी खोजाथों कि हुवाँ से जाते जाते बस तोहरे के मिल लेबों लेकिन मोर तो आशरा आहे कि मोंयं यदि प्रभु चाहि होले थोड़ा समय तोहरे केर सागें रहबों भी। ८मोंयं पितेकुस्त केर उत्सव तक ईफिसुस मेंहे ठहरबों। ९काहेकि ठोस काम करेक केर सम्भावनामान केर हुवाँ बड़का द्वार खोलाल आहे आउर फिर हुवाँ मोर विरोधी भी तो बहुत आहाँए।

१०यदि तिमथियुस आए पहुँची होले ध्यान रखबा उके तोहार सागें कष्ट न होक काहेकि मोर समाने उ भी प्रभु केर काम कराथे। ११ईकार लागिन केहो भी उके छोटो न समझोक। उके उकार यात्रा में शान्ति केर सागें विदा करबा ताकि उ मोर टिन आए पहुँची। मोंयं दोसरा भाईमान केर सागें उकार आवेक केर प्रतीक्षा कराथों।

१३एखान हमार भाई अपुल्लौस केर बात ई हेके कि मोंग्रं उके दोसरा भाईमान केर सागें तोहार टिन जाएक केर लागिन अत्यधिक प्रोत्साहित कईरौं। किन्तु परमेश्वर केर ई ईच्छा बिल्कुल नी राहे कि उ एखान तोहार टिन आवेक केर। सेहेसे अवसर पाते ही उ आए जाई।

### पौलुस केर चिट्ठी केर समाप्ति

१३सावधान रहा। दृढ़ता केर सागें अपन विश्वास में अटल बईन रहा। साहसी बना, शक्तिशाली बना। १४तोहरे जे कुछ भी करबा, प्रेम से करबा।

१५तोहरे मान स्तिफनुस केर घराना के तो जानाला कि उमान अखाया केर फसल केर पहिला फल हेकाँए। उमान परमेश्वर केर पुरुषमान केर सेवा केर बीड़ा उठाहाँए। सेहेसे भाईमान। तोहरे से मोर निवेदन आहे कि १६तोहरेमान भी अपन के ऐसान आदमीमान केर आउर हर उ व्यक्ति केर अगुवाई में सौँईप देवा जे ई काम से जुडेना आउर प्रभु केर लागिन परिश्रम करेना।

१७स्तिफनुस, फुरतुनातुस आउर अखईकुस केर

उपस्थिति से मोंग्रं खुशी आहों। काहेकि मोर लागिन जेके तोहरे नी करेक सकला, उके उमान कईर देखाँलौँ। १८उमान मोर तथा तोहरे केर आतमा के आनन्दित कईरौँए। ईकार लागिन ऐसान आदमीमान केर सम्मान करा।

१९एशिया प्रान्त केर कलीसियामान केर ओर से तोहरे के प्रभु में नमस्कार। अक्विला आउर प्रिस्किल्ला। उमान केर घर में एकत्र होवेक वाला कलीसिया केर ओर से तोहरे के हार्दिक नमस्कार। २०सोभे बंधुमान केर ओर से तोहरे के नमस्कार। पवित्र चुम्बन केर सागें तोहरे आपस में एक दोसरे केर सन्मान करा।

२१मोंग्रं, पौलुस, तोहरे के अपन हाथ से नमस्कार लिखाथों। २२यदि केहो प्रभु में प्रेम नी कराएना होले उके अभिशाप मिलोक!

हे प्रभु, आओ!<sup>a</sup>

२३प्रभु यीशु केर अनुग्रह तोहरे के मिलते रहोक।

२४यीशु मसीह में तोहरे केर प्रति मोर प्रेम सोउब कर सागें रहोक।

<sup>a</sup> १६:२२ हमार प्रभु आओ अरामिक भाषा में “मारानाथा!”